

大智度論卷第六十六

龍 樹 菩 薩 造

姚秦三藏法師鳩摩羅什譯

釋聞持品第四十五之上

經作經耳
聞持品

爾時，釋提桓因作是念：「若善男子、善女人得聞般若波羅蜜經耳者，是人於前世佛所作功德與善知識相隨，何況受持、親近、讀誦、正憶念如說行，當知是善男子、善女人多親近諸佛，能得聽受，乃至正憶念如說行，能問能答，當知是善男子、善女人於前世多供養親近諸佛，故聞是深般若波羅蜜，不驚、不怖、不畏，當知是人亦於無量億劫行檀波羅蜜、尸羅波羅蜜、羼提波羅蜜、毗梨耶波羅蜜、禪波羅蜜、般若波羅蜜。」爾時，舍利弗白佛言：「世尊若

2453

二

有善男子、善女人聞是深般若波羅蜜，不驚、不怖、不畏，聞已受持、親近，如說習行，當知是善男子、善女人如阿鞞跋致菩薩摩訶薩。何以故？世尊是般若波羅蜜甚深，若先世不久行檀波羅蜜、尸羅波羅蜜、羼提波羅蜜、毗梨耶波羅蜜、禪波羅蜜、般若波羅蜜，終不能信解深般若波羅蜜。世尊若有善男子、善女人毀謗深般若波羅蜜者，當知是人前世亦毀謗深般若波羅蜜。何以故？是善男子、善女人聞說深般若波羅蜜時，無信、無樂、心不清淨，當知是善男子、善女人先世不問不難諸佛及弟子云何應行檀波羅蜜、尸羅波羅蜜、羼提波羅蜜、毗梨耶波羅蜜、禪波羅蜜、般若波羅蜜，云何應修內空，乃至云何應修無法有法空，云何應修四念處，乃至云何應修八聖道分，云何應修佛十力，乃至云何應修十八不共法？

2454

釋提桓因語舍利弗：「是深般若波羅蜜，若有善男子、善女人，不久行檀波羅蜜、尸羅波羅蜜、羼提波羅蜜、毗梨耶波羅蜜、禪波羅蜜、般若波羅蜜，不行內空乃至無法有法空，不行四禪、四無量心、四無色定，不行四念處乃至八聖道分，不行佛十力乃至十八不共法，如是人，不信解是般若波羅蜜，有何可怪！大德舍利弗！我禮般若波羅蜜！禮般若波羅蜜，是禮一切智。」佛告釋提桓因：「如是！如是！憍尸迦！禮般若波羅蜜，是禮一切智。何以故？憍尸迦！諸佛一切智，皆從般若波羅蜜生，一切智即是般若波羅蜜。以是故，憍尸迦！善男子、善女人，欲住一切智，當住般若波羅蜜。若善男子、善女人，欲生道種智，當習行般若波羅蜜。欲斷一切諸結及習，當習行般若波羅蜜。善男子、善女人，欲轉法輪，當習行般若波羅蜜。善

男子、善女人，欲得須陀洹果、斯陀含果、阿那含果、阿羅漢果，當習行般若波羅蜜；欲得辟支佛道，當習行般若波羅蜜；欲教衆生，令得須陀洹果、斯陀含果、阿那含果、阿羅漢果、辟支佛道，當習行般若波羅蜜。若善男子、善女人，欲教衆生，令得阿耨多羅三藐三菩提，若欲總攝比丘僧，當習行般若波羅蜜。」

論釋曰：釋提桓因是諸天主，利根智勝，信佛法，故倍復增益，如火得風，愈更熾盛。聞須菩提，以種種因緣，讚般若波羅蜜，佛以深理成其所讚。帝釋發希有心，作是念：若善男子、善女人，得聞般若經耳者，是人於前世多供養諸佛，作大功德，今世得遇好師、同學等善知識，因先世供養佛緣，今世善知識，故聞般若波羅蜜，能信；何況讀誦、思惟、正憶念、修習禪定、籌量分別義趣，能成辦事者，當知

是人，從過去諸佛及弟子，聞深般若波羅蜜義信受，不怖、不畏。何以故？是人於無量阿僧祇劫，行六波羅蜜等諸功德，是故雖未得阿鞞跋致地，於深法中不疑、不悔。譬如新擘乾毳，隨風東西溼毳，縹緲則不可動。新發意菩薩亦如是不久修德，作福淺薄，隨他人語，不能信受般若波羅蜜。若久修福德，不隨他語，則能信受深般若波羅蜜，不驚、不怖。帝釋思惟念般若波羅蜜有無量功德時，舍利弗知帝釋所念，而白佛言：世尊！善男子、善女人，雖未入菩薩位，能信受深般若波羅蜜，不驚、不怖，如說行，是人大福德、智慧、信力，故當知如阿鞞跋致無異。此中佛自說因緣：般若波羅蜜甚深，無相可取、可信、可受，若能信受，是為希有，如人空中種植，是為甚難！一切凡人得勝法，則捨本事，如得禪定樂，捨五欲樂，乃至依有頂

2457

處，捨無所有處功德，不能無所依止而有所捨。如尺蠖尋條，安前足進後足，盡樹端更無所依止，還歸本處。是菩薩未得道於般若波羅蜜無所依止，而能修福德，捨五欲，是事希有，是中說因緣。是人先世信受，久行六波羅蜜，大集諸福德，與信相違，則毀訾般若。如厚福德者，從久積集不信毀訾者，亦從久習。問曰：若先世毀訾、誹謗，應墮地獄，何緣復得聞般若？答曰：有人言，是人墮地獄罪畢，還來毀訾，不說次後身。有人言，作業積集厚重，則能與果報，是人前世雖不信，而積業未厚，則未得果報，以餘福德，故生人中，續復不信。復次，有人言：五逆罪，次後身必受，餘罪不爾，或次後身，或久後身。爾時，帝釋語舍利弗：是般若波羅蜜，畢竟空無所有，故甚深。菩薩不久行功德，則著心堅固，信力微弱，不信般若波羅蜜，乃至

2458

一切智，何足怪！帝釋思惟籌量，信般若波羅蜜，福德無量，不信者，得罪深重。深愛敬般若波羅蜜，故發是言：我當禮是般若，何以故？禮般若波羅蜜，則為禮一切智；禮一切智者，則禮三世十方諸佛。爾時，佛可其言，復說讚般若波羅蜜因緣：所謂諸佛一切智慧，皆從般若中生，是故言：若有菩薩欲住一切智中，乃至總攝比丘僧，當習行般若波羅蜜。

釋提桓因白佛言：「世尊，菩薩摩訶薩欲行般若波羅蜜時，云何名住般若波羅蜜、禪波羅蜜、毗梨耶波羅蜜、羼提波羅蜜、尸羅波羅蜜、檀波羅蜜？云何住內空，乃至無法有法空？云何住四禪、四無量心、四無色定、五神通？云何住四念處，乃至八聖道分？云何住佛十力，乃至十八不共法？世尊，菩薩摩訶薩，云何習行般若波羅蜜？」

蜜，乃至檀波羅蜜內空，乃至十八不共法。」佛語釋提桓因：「善哉！善哉！憍尸迦，汝能樂問是事，皆是佛神力。憍尸迦，若菩薩摩訶薩行般若波羅蜜時，若不住色中，為習行般若波羅蜜；若不住受、想、行、識中，為習行般若波羅蜜；眼、耳、鼻、舌、身、意、色、聲、香、味、觸、法、眼界，乃至意識界，亦如是。憍尸迦，若菩薩摩訶薩不住般若波羅蜜中，為習行般若波羅蜜；不住禪波羅蜜中，為習禪波羅蜜；不住毗梨耶波羅蜜中，為習毗梨耶波羅蜜；不住羼提波羅蜜中，為習羼提波羅蜜；不住尸羅波羅蜜中，為習尸羅波羅蜜；不住檀波羅蜜中，為習檀波羅蜜。如是，憍尸迦，是名菩薩摩訶薩不住般若波羅蜜，為習般若波羅蜜。憍尸迦，不住內空中，為習內空，乃至不住無法有法空，為習無法有法空；不住四禪，為習四禪；不住四無量心，

爲習四無量心，不住四無色定，爲習四無色定，不住五神通，爲習五神通，不住四念處，爲習四念處，乃至不住八聖道分，爲習行八聖道分，不住佛十力，爲習行佛十力，乃至不住十八不共法，爲習行十八不共法，何以故？橋尸迦，是菩薩不得色，可住可習處，乃至十八不共法，不得十八不共法，可住可習處。復次，橋尸迦，菩薩摩訶薩，不習色，若不習色，是名習色，受、想、行、識，乃至十八不共法，亦如是。何以故？是菩薩摩訶薩，色前際不可得，中際不可得，後際不可得，乃至十八不共法亦如是。」舍利弗白佛言：「世尊，是般若波羅蜜甚深。」佛言：「色如甚深故，般若波羅蜜甚深，受、想、行、識如甚深故，般若波羅蜜甚深，乃至十八不共法亦如是。」舍利弗言：「世尊，是般若波羅蜜難可測量。」佛言：「色難可測量故，般

2461

若波羅蜜難可測量，受、想、行、識，乃至十八不共法難可測量故，般若波羅蜜難可測量。」世尊，是般若波羅蜜無量。」佛言：「色無量故，般若波羅蜜無量，受、想、行、識，乃至十八不共法無量故，般若波羅蜜無量。」佛告舍利弗：「若菩薩摩訶薩，行般若波羅蜜時，不行色甚深，爲行般若波羅蜜，不行受、想、行、識，乃至不行十八不共法甚深，爲行般若波羅蜜。何以故？色甚深相爲非色，受、想、行、識，乃至十八不共法甚深相，爲非十八不共法，如是不行，爲行般若波羅蜜。舍利弗，若菩薩摩訶薩，行般若波羅蜜時，不行色難測量，爲行般若波羅蜜，不行受、想、行、識，乃至不行十八不共法難測量，爲行般若波羅蜜。何以故？色難測量相，爲非色，受、想、行、識，乃至十八不共法難測量相，爲非十八不共法。舍利弗，若菩薩摩訶薩，

2462

行般若波羅蜜時，不行色無量，爲行般若波羅蜜。不行受、想、行、識，乃至不行十八不共法無量，爲行般若波羅蜜。何以故？色是無量相，爲非色；受、想、行、識，乃至十八不共法無量相，爲非十八不共法。舍利弗白佛言：「世尊！是般若波羅蜜甚深，甚深相難見難解，不可思量，不應在新發意菩薩前說。何以故？新發意菩薩聞是甚深般若波羅蜜，或當驚怖，心生疑悔，不信不行，是甚深般若波羅蜜，當在阿鞞跋致菩薩摩訶薩前說，是菩薩聞是甚深般若波羅蜜，不驚、不怖、心不疑悔，則能信行。」釋提桓因問舍利弗：「若在新發意菩薩摩訶薩前說，是深般若波羅蜜，有何等過？」舍利弗報釋提桓因：「憍尸迦！若在新發意菩薩前說，是深般若波羅蜜，或當驚怖，毀譽不信，是新發意菩薩或有是處。若新發意菩薩聞是

2463

深般若波羅蜜，毀譽不信，種三惡道業，是業因緣故，久久難得阿耨多羅三藐三菩提。」

論釋曰：爾時，帝釋從佛聞讚般若波羅蜜具足故，今問佛菩薩云：何住般若波羅蜜，從禪波羅蜜，乃至十八不共法？佛讚言：善哉！善哉！者，以釋提桓因諸天中主，言必可信。問是事，斷大眾疑，通達無礙，能大利益，故言善哉！善哉！復次，佛以帝釋能捨上妙五欲七寶宮殿，能問佛賢聖所行事，是故言善哉！以佛神力故，汝能樂問此事。是中更有上妙諸天，觀佛神德無量，今帝釋能於大眾中諮問佛事，故是佛威神。如持心經說：佛光明入身中，能問佛事。佛答憍尸迦：若菩薩不住色等，是習行般若波羅蜜者，是菩薩見色無常、苦等過罪，故不住色；若不住色，即是能習行般若波羅蜜。凡夫人

2464

見色著色故起顛倒煩惱，失是般若波羅蜜道。以是故不住者能習行般若波羅蜜。五衆十二入十八界亦如是。問曰：何以故不住六波羅蜜等各各自習其行？答曰：是六波羅蜜等皆是善法行法。以是故說不住六度等言各習其行。衆界入爲習行般若波羅蜜。若於是法中不著，則斷愛著，斷愛著故色等諸法中清淨習。此中說不住因緣，所謂不得色等法住處，不得色等法習處。復次佛以此事難解，故更說因緣：不習色者是菩薩見色過，故不住色中，不住故不習。習色名取色相，若常若無常等。復次菩薩常行善法，正語正業等積習純厚，故名習色。今菩薩欲行般若故，散壞是色不習。所以者何？過去色已隨滅，未來色未有故，不可習。現在色生時即滅，故不住。若住一念尚無習，何況念念滅。是故此中說不習色。

因緣三世色不可得，乃至十八不共法亦如是。若能如是觀諸法，散壞不取相，是名能習色等。習色等諸法實相。爾時舍利弗從佛聞是義歡喜深入空智，白佛：般若波羅蜜甚深，佛然可成其所讀。色等諸法如故甚深。佛語：不但眼見色甚深，以般若波羅蜜分別色入如實故甚深。如雨滲滲，不名甚深，和合衆流入於大海，乃名甚深。色等亦如是。天眼肉眼見淺而不深，若以慧眼觀，則深不可測。甚深故難可測量，唯有諸佛乃盡其底。甚深不可測量，故名無量。無有智慧能取色等實相，若常若無常，籌量有過罪故。是時舍利弗及諸聽者，作是念：般若波羅蜜不可測量，無有量。菩薩當云何行？佛知其念，告舍利弗：菩薩摩訶薩若行色等甚深者，則爲失般若波羅蜜。若不行色甚深，是爲得般若波羅蜜。凡夫鈍

根，故言甚深。若有一心福德利根者，爲非甚深。譬如水深淺無定，若於小兒則深，長者則淺，乃至大海於人則深，於羅睺阿修羅王則淺。如是於凡夫人新發意，懈怠者爲甚深，於久積德阿鞞跋致則淺。諸佛如羅睺阿修羅王於一切法無有深者，得無礙解脫。故以是故，知爲衆生及時節利鈍，初久懈怠精進，故分別說深淺。不可測量，無有量，亦如是。此中佛自說因緣，色等法甚深，相爲非色。何以故？怖畏心沒疑悔，故以色爲甚深，色相則無深。如先說，舍利弗白佛言：世尊，是般若波羅蜜甚深，甚深相難見難解。問曰：上說菩薩不行甚深，爲行般若波羅蜜，今舍利弗何以復說甚深？答曰：舍利弗非定心說甚深，得佛意趣爲人，故說甚深。是故此中說：世尊不應於新發意菩薩前，說是般若波羅蜜，新學菩薩聞是深智

慧，則心沒，應當在阿鞞跋致菩薩前說，阿鞞跋致智慧深，故信而不沒。譬如深水，不應使小兒渡，應教大人令渡。帝釋問舍利弗，若爲新發意菩薩說，有何等過？舍利弗答：是新發意者，則不信心沒，心沒故生疑悔怖畏。若受一切空法，我云何當墮斷滅中？若不受者，佛所說法，何可不受？是故怖畏生疑悔。若心定，則生惡邪毀謗，毀謗果報如地獄品中說。此中略說種三惡道業因緣，久久難得無上道。

釋提桓因問舍利弗：「頗有未受記菩薩摩訶薩，聞是深般若波羅蜜，不驚不怖者不？」舍利弗言：「如是！橋尸迦！若有菩薩摩訶薩，聞是深般若波羅蜜，不驚不怖，當知是菩薩受阿耨多羅三藐三菩提，記不久，不過一佛兩佛。」佛告舍利弗：「如是！如是！是

菩薩摩訶薩，久發意行六波羅蜜，多供養諸佛，聞是深般若波羅蜜，不驚、不怖、不畏，聞即受持，如般若波羅蜜所說行。爾時，舍利弗白佛言：「世尊，我欲說譬喻，如求菩薩道善男子、善女人，夢中修行般若波羅蜜，入禪定，勤精進，具足忍辱，守護於戒，行布施，修行內空、外空，乃至坐於道場，當知是善男子、善女人，近阿耨多羅三藐三菩提，何況菩薩摩訶薩，欲得阿耨多羅三藐三菩提，覺時修行般若波羅蜜，入禪定，勤精進，具足忍辱，守護於戒，行布施，而不疾成阿耨多羅三藐三菩提，坐於道場，世尊善男子、善女人，善根成就，得聞般若波羅蜜，受持乃至如說行，當知是菩薩摩訶薩，久發意種善根，多供養諸佛，與善知識相隨，是人能受持般若波羅蜜，乃至正憶念，當知是人近受阿耨多羅三藐三菩提，記當知

2469

是善男子、善女人，如阿鞞跋致菩薩摩訶薩，於阿耨多羅三藐三菩提不動轉，能得深般若波羅蜜，得已能受持、讀誦，乃至正憶念。世尊譬如人欲過百由旬，若二百、三百、四百由旬，曠野險道，先見諸相，若放牧者，若疆界，若園林，如是等諸相，故知近城邑聚落，是人見是相已，作如是念：如我所見，相當知城邑聚落不遠，心得安隱，不畏賊難、惡蟲、飢渴。世尊菩薩摩訶薩亦如是，若得是深般若波羅蜜，受持、讀誦，乃至正憶念，當知近受得阿耨多羅三藐三菩提，記不久當知是菩薩摩訶薩，不應畏墮聲聞、辟支佛地。是諸先相，所謂甚深般若波羅蜜，得聞、得見、得受，乃至正憶念故。佛告舍利弗：「如是如是，汝復樂說者，便說。」世尊譬如人欲見大海，發心往趣，不見樹相，不見山相，是人雖未見大海，知大海不遠。

2470

何以故？大海處平，無樹相，無山相。如是，世尊！菩薩摩訶薩，聞是深般若波羅蜜，受持乃至正憶念時，雖未佛前受劫數之記，若百劫、千劫、萬劫、百千億劫，是菩薩自知近受阿耨多羅三藐三菩提。記不久。何以故？我得聞是深般若波羅蜜，受持讀誦，乃至正憶念故。世尊！譬如初春，諸樹陳葉已墮，當知此樹新葉華果，出在不久。何以故？見是諸樹先相，故知今不久葉華果出。是時閻浮提人，見樹先相，皆大歡喜。世尊！菩薩摩訶薩，得聞是深般若波羅蜜，受持讀誦，乃至正憶念如說行，當知是菩薩善根成就，多供養諸佛。是菩薩應作是念：先世善根所追趣阿耨多羅三藐三菩提，以是因緣，故得見得聞是深般若波羅蜜，受持讀誦，乃至正憶念如說行。是中諸天子曾見佛者，歡喜踊躍，作是念言：先諸菩薩摩訶薩，亦

有如是受記先相，今是菩薩摩訶薩，受阿耨多羅三藐三菩提，記亦不久。世尊！譬如母人懷妊，身體苦重，行步不便，坐起不安，眠食轉少，不喜言語，厭本所習，受苦痛故，有異母人見其先相，當知產生不久。菩薩摩訶薩亦如是，種善根，多供養諸佛，久行六波羅蜜，與善知識相隨，善根成就，得聞深般若波羅蜜，受持讀誦，乃至正憶念如說行，諸人亦知是菩薩摩訶薩，得阿耨多羅三藐三菩提，記不久。佛告舍利弗：「善哉！善哉！汝所樂說，皆是佛力。」爾時，須菩提白佛言：「希有世尊！諸多陀阿伽度、阿羅訶、三藐三佛陀，善付諸菩薩摩訶薩事。」佛告須菩提：「諸菩薩摩訶薩，發阿耨多羅三藐三菩提心，安隱多衆生，令無量衆生得樂，憐愍安樂，饒益諸天人，故是諸菩薩行菩薩道時，以四事攝無量百千衆

生，所謂布施、愛語、利益、同事，亦以十善道成就衆生。自行初禪，亦教他人令行初禪，乃至自行非有想非無想處，亦教他人令行乃至非有想非無想處。自行檀波羅蜜，亦教他人令行檀波羅蜜；自行尸羅波羅蜜，亦教他人令行尸羅波羅蜜；自行羼提波羅蜜，亦教他人令行羼提波羅蜜；自行毗梨耶波羅蜜，亦教他人令行毗梨耶波羅蜜；自行禪波羅蜜，亦教他人令行禪波羅蜜；自行般若波羅蜜，亦教他人令行般若波羅蜜。是菩薩得般若波羅蜜，以方便力，教衆生令得須陀洹果，自於內不證，教衆生令得斯陀含果，阿那含果，阿羅漢果，自於內不證，教衆生令得辟支佛道，自於內不證。自行六波羅蜜，亦教無量百千萬諸菩薩，令行六波羅蜜；自住阿鞞跋致地，亦教他人住阿鞞跋致地。自淨佛世界，亦教他人

2473

淨佛世界，自成就衆生，亦教他人成就衆生。自得菩薩神通，亦教他人令得菩薩神通；自淨陀羅尼門，亦教他人淨陀羅尼門；自具足樂說辯才，亦教他人具足樂說辯才。自受色成就，亦教他人令受色成就；自成就三十二相，亦教他人成就三十二相；自成就童真地，亦教他人成就童真地。自成就佛十力，亦教他人令成就佛十力；自行四無所畏，亦教他人行四無所畏；自行十八不共法，亦教他人行十八不共法；自行大慈大悲，亦教他人令行大慈大悲。自得一切種智，亦教他人令得一切種智；自離一切結使及習，亦教他人令離一切結使及習。自轉法輪，亦教他人轉法輪。」

2474

論釋曰：爾時，帝釋問舍利弗：頗有未受記菩薩，聞是深般若，不驚怖者？舍利弗言：無有不受記聞般若，能信者。若或時能信者，當

知垂欲受記，不過見一佛二佛便得受記。佛可舍利弗語。舍利弗聞佛可其所說，心生歡喜，復欲分明了了是事故說譬喻，作是言：夢中心爲睡所覆，故非真心所作。若善男子、善女人，於夢中發意行六波羅蜜，乃至坐於道場，當知是人福德輕微，近於受阿耨多羅三藐三菩提。何況菩薩摩訶薩覺時，實心發阿耨多羅三藐三菩提，行六波羅蜜而不近受記！世尊！若人往來六道生死中，或時得聞般若波羅蜜，受持讀誦，正憶念，必知是人不久得阿耨多羅三藐三菩提。如吞鉤之魚，雖復遊戲池中，當知出在外不久。行者亦如是，深信樂般若波羅蜜，不久住於生死。此中舍利弗自說譬喻：若人欲過險道，險道者即是世間；百由旬者，是欲界；二百由旬者，是色界；三百由旬者，是無色界；四百由旬者，是聲聞、辟支佛

2475

道。復次，四百由旬是欲界，三百是色界，二百是無色界，百由旬是聲聞、辟支佛。欲出者，是信受行般若波羅蜜人。先見諸法相者，見大菩薩捨世間欲樂，深心樂般若波羅蜜。疆界者，分別諸法，是聲聞法，是辟支佛法，是大乘法。如是小利是聲聞，大利是菩薩。魔界是生死，佛界是般若波羅蜜甘露味不死之處。園林者，隨佛道禪定、智慧等樂。如是等無量善法相。聚落者，是柔順法忍。邑是無生法忍，城是阿耨多羅三藐三菩提。得安隱者，菩薩聞是法，思惟籌量行，我得是法心安隱，當得阿耨多羅三藐三菩提。賊者，是我等六十二邪見惡蟲者，是愛、恚等諸煩惱。不畏賊者，人不得便。不畏惡蟲者，非人不得便。不畏飢者，不畏不能得聖人真智慧。不畏渴者，不畏不能得禪定、解脫等法樂味。此中自說因緣。菩薩摩訶薩

2476

得先相者，不久當得阿耨多羅三藐三菩提，不畏墮惡道中飢餓死者，不畏墮聲聞辟支佛地。佛然可其喻，以粗喻細，以世間喻出世間。餘三譬喻，亦應如上分別說。大海水是無上道，平地無樹無山，是般若波羅蜜經卷等。樹果是無上道，樹華是阿鞞跋致地。春時陳葉落，更生新葉，是諸煩惱邪見、疑等滅，能得般若波羅蜜經卷等。母人是行者，所妊身是無上道。欲產相是菩薩久習行般若波羅蜜。厭本所習，是患世間淫欲樂，不復喜著。佛讚其所說善哉。爾時，須菩提聞佛然舍利弗所說，讚其善哉，知佛意深，敬念是菩薩，是故白佛言：世尊甚為希有，善付菩薩事。菩薩事者，空道、福德道，亦如佛種種總相別相說。以寄付阿難、彌勒等，入無餘涅槃後，好自奉行教示，利益衆生，無令謬錯。佛說善付因緣，諸菩薩發阿

2477

耨多羅三藐三菩提心。安隱多衆生者，一切衆生中，無量無邊阿僧祇，除佛無能計知者。從佛得利益者不可數知，名多。安隱者，衆生著常者教無常，著樂者教苦，著實者教空，著我者教無我。如是等名安隱。凡夫人聞是，當時雖不喜樂，久久滅諸煩惱，得安隱樂。如服苦藥，當時雖苦，後得除患。無量衆生得樂者，菩薩求般若波羅蜜未得成就時，以今世後世樂利益衆生。如菩薩本生經說：若得般若波羅蜜，已滅諸煩惱，亦以世間樂、出世間樂利益衆生。若得無上道時，但以出世間樂利益衆生。安樂饒益者，但以憐愍心故。安樂饒益者，多利益天人，餘道中饒益少，故不說。利益事者，所謂四攝法。以財施、法施二種攝取衆生。愛語有二種：一者隨意愛語；二者隨其所愛法爲說。是菩薩未得道，憐愍衆生，自破憍慢，隨

2478

意說法若得道隨所應度法爲說高心富人爲讚布施是人能得他物利名聲福德故若爲讚持戒毀訾破戒則心不喜樂如是等隨其所應而爲說法利益亦有二種一者今世利後世利爲說以法治生勤修利事二者不信教令信破戒令持戒寡識令多聞不好施者令布施癡者教智慧如是等以善法利益衆生同事者菩薩教化衆生令行善法同其所行菩薩善心衆生惡心能化其惡令同己善是菩薩以四種攝衆生令住十善道是廣說四攝義於二施中法施隨其所樂而爲說法是愛語中第一衆生愛惜壽命令行十善道則得久壽利益於一切寶物利中法利最勝是爲利益同事中同行善法爲勝是菩薩自行十善亦以教人有人言後自行十善等是第四同義是故說自行十善亦教人行自行初禪

亦教他行初禪等同離欲同持戒是故名相攝相攝故漸漸能以三乘法度乃至非有想非無想處亦如是自行六波羅蜜亦以教他因般若故令衆生得般若分所謂得須陀洹等方便力故自不證是人福德智慧力增益故教無量阿僧祇菩薩令住六波羅蜜自住阿鞞跋致地等亦以教他乃至自轉法輪亦教他轉法輪是故我以慈悲心故善付菩薩事不以愛著故

大智度論卷第六十六

校譌

第十六面二行令北

音釋

擘補來切 毳充芮切 毳毼毼音薛 媿烏郭切 疆居良切
分隸也 細毛也 直利切 媿媿名 疆界也

大智度論卷第六十七

龍樹菩薩造

姚秦三藏法師鳩摩羅什譯

釋聞持品第四十五之下

經須菩提白佛言：「希有世尊！諸菩薩摩訶薩大功德成就，所謂爲一切衆生行般若波羅蜜，欲得阿耨多羅三藐三菩提。世尊云何諸菩薩摩訶薩具足修行般若波羅蜜？」佛告須菩提：「若菩薩摩訶薩行般若波羅蜜時，不見色增相，不見色減相，不見受、想、行、識增相，亦不見減相，乃至一切種智，不見增相，亦不見減相。菩薩摩訶薩是時，具足般若波羅蜜。復次，須菩提，菩薩摩訶薩行般若波羅蜜時，不見是法，是非法，不見是過去法，是未來，現在法，不

2481

二

見是善法，不善法，有記法，無記法，不見是有爲法，無爲法，不見欲界，色界，無色界，不見檀波羅蜜，尸羅波羅蜜，羼提波羅蜜，毗梨耶波羅蜜，禪波羅蜜，般若波羅蜜，乃至不見一切種智。如是菩薩摩訶薩具足修行般若波羅蜜，何以故？諸法無相故，諸法空，欺誑，無堅固，無覺者，無壽命者。須菩提言：「世尊！世尊所說不可思議。」佛告須菩提：「色不可思議，故所說不可思議，受、想、行、識不可思議，故所說不可思議。六波羅蜜不可思議，故所說不可思議，乃至一切種智不可思議，故所說不可思議。須菩提，若菩薩摩訶薩行般若波羅蜜時，知色是不可思議，受、想、行、識是不可思議，乃至知一切種智是不可思議，菩薩則不能具足般若波羅蜜。」須菩提白佛言：「世尊！是深般若波羅蜜，誰當信解者？」佛言：「若

2482

有菩薩摩訶薩久行六波羅蜜種善根多親近供養諸佛與善知識相隨是菩薩能信解深般若波羅蜜。須菩提白佛言：「世尊！云何菩薩摩訶薩久行六波羅蜜種善根多親近供養諸佛與善知識相隨？」佛言：「若菩薩摩訶薩不分別色不分別色相不分別色性不分別受想行識不分別識相不分別識性眼耳鼻舌身意色聲香味觸法眼界乃至意識界亦如是不分別欲界色界無色界不分別三界相性不分別檀波羅蜜乃至般若波羅蜜內空乃至無法有法空四念處乃至八聖道分佛十力乃至十八不共法不分別十八不共法相性不分別道種智相性不分別一切種智不分別一切種智相不分別一切種智性何以故須菩提！色不可思議受想行識不可思議乃至一切種智不可思議如是須菩

提！是名菩薩摩訶薩久行六波羅蜜種善根多親近供養諸佛與善知識相隨。」

須菩提白佛言：「世尊！色甚深故般若波羅蜜甚深受想行識甚深乃至一切種智甚深故般若波羅蜜甚深。世尊！是般若波羅蜜珍寶聚有須陀洹果寶故有斯陀含果阿那含果阿羅漢果辟支佛道阿耨多羅三藐三菩提寶故有四禪四無量心四無色定五神通四念處乃至八聖道分佛十力四無所畏四無礙智大慈大悲十八不共法一切智一切種智寶故。世尊！是般若波羅蜜清淨聚色清淨故般若波羅蜜清淨聚受想行識清淨乃至一切種智清淨故般若波羅蜜清淨聚。」

論釋曰：是菩薩大功德成就者如先說自行亦教他人復次多功

德者，衆生非親里，又無所貪利，而爲是衆生勤苦行般若波羅蜜，得阿耨多羅三藐三菩提，是名菩薩摩訶薩有大恩分，故名大功德。修般若波羅蜜相如先品中種種因緣說。今問修般若具足相？佛言：如修般若具足相亦如是。所以者何？若菩薩不見色等諸法增減，如是名具足。是菩薩雖得十地，坐道場，爾時修般若波羅蜜具足如夢如幻，不增不減，以畢竟空故說。復次，若菩薩於一切法，不分別是法是非法，悉皆是法，如大海水百川萬流皆合一味，爾時修般若波羅蜜具足。復次，若菩薩入法空中，不見法有三世善不善等，不見六波羅蜜，乃至一切種智，爾時修般若波羅蜜具足。何以故？諸法無相是實相，若分別諸法皆是邪見相，用十八空故名諸法空，諸法和合因緣生，以爲有，諸緣離則破壞，故虛誑一切。

2485

有爲法中，無常無實故，是名不堅固。無受苦樂者，衆生空故；無覺者，不覺苦樂；無壽命者，壽名命根。有人言：是命根有我相，是故壽命爲我。衆生空中，以種種因緣破，是故無行法者，無受法者。若觀諸法空，衆生空，法空，如是則具足修般若波羅蜜。須菩提，是時驚喜，不能自安，所說般若波羅蜜不可思議。佛言：色等諸法不可思議，故不可思議。所以者何？因果相似故。復次，若菩薩知色等法亦不可思議，若住是不可思議中，則不具足般若波羅蜜，取不可思議相故。是故說：若菩薩知色等法不可思議相，則不具足般若波羅蜜。

爾時，須菩提於般若中不得依止處，如沒大海，是故白佛：是深般若不可思議，不可思議亦不可思議，故誰當信解者？若但不可思

2486

議猶不可信，何況不可思議復不可思議！佛答若菩薩久行六波羅蜜，久種善根，久供養親近諸佛，久與善知識相隨，是因緣故，信心牢固，能信受深般若波羅蜜。餘品中說有新發意者，亦能信深般若波羅蜜，今佛說久發意故能信。是以須菩提問：云何是久發意者？佛言：若菩薩摩訶薩，了了知般若波羅蜜相，不分別一切法，所謂不分別色、四大、若四大造色，不分別色相者，不分別色是可見，聲是可聞，是色若好若醜，若短若長，若常若無常，若苦若樂等，不分別色性者，不見色常法，所謂地堅性等。復次，色實性名法性，畢竟空故，是菩薩不分別法性，法性不壞相故。乃至一切種智亦如是。問曰：地是堅相，何以言性？答曰：是相積習成性，譬如人瞋，日習不已，則成惡性，或性相異，如見煙知火，煙是火相，而非火也。或

相性不異，如熱是火相，亦是火性。此中佛說因緣：色等諸法不可思議，不可思議即是畢竟空，諸法實相常清淨。須菩提言：菩薩雖日月年歲不久，能如是行，是名久。須菩提聞般若波羅蜜，更得深利益，故白佛言：世尊，般若波羅蜜甚深，色等甚深故。色等甚深相，如先說。世尊，般若波羅蜜是珍寶聚，珍寶聚者，所謂須陀洹果，能滅三結惡毒故，乃至阿耨多羅三藐三菩提，能滅一切煩惱及習，能滿一切願。是諸果，依諸禪，乃至一切種智，因果合說，是名珍寶聚。是般若波羅蜜清淨聚，色等諸法清淨故，色等法中正行不邪，名為清淨，無諸過患，乃至畢竟空亦不著，不可思議亦不著，是故名清淨聚。爾時爾時二百二十九字，應移至後段論文之前。須菩提應作是念：是般若波羅蜜，是珍寶聚，能滿一切衆生願，所謂今

世樂，涅槃樂，阿耨多羅三藐三菩提樂。愚癡之人而復欲破壞，是般若波羅蜜清淨聚，如如意寶珠無有瑕穢，如虛空無有塵垢。般若波羅蜜畢竟清淨聚，而人自起邪見因緣，欲作留難破壞。譬如人眼翳，見妙珍寶，謂爲不淨，作是念已。

【經】須菩提言：「世尊甚可怪！說是般若波羅蜜時，多有留難。」佛言：「如是如是，須菩提，是甚深般若波羅蜜，多有留難。以是事故，善男子，善女人，若欲書是般若波羅蜜時，應當疾書，若讀誦、思惟、說、正憶念、修行時，亦應疾修行。何以故？是甚深般若波羅蜜，若書時、讀誦、思惟、說、正憶念、修行時，不欲令諸難起。故善男子，善女人，若能一月書成，當應勤書；若二月、三月、四月、五月、六月、七月，若一歲書成，亦當勤書、讀誦、思惟、說、正憶念、修行。若一月得成就，乃至

一歲得成就，應當勤成就。何以故？須菩提，是珍寶中多有難起。故。」須菩提言：「世尊，是甚深般若波羅蜜中，惡魔喜作留難，故不得令書，不得令讀誦、思惟、說、正憶念、修行。」佛告須菩提：「惡魔雖欲留難，是深般若波羅蜜，令不得書、讀誦、思惟、說、正憶念、修行，亦不能破壞。是菩薩摩訶薩，書般若波羅蜜乃至修行。」爾時，舍利弗白佛言：「世尊，誰力故，令惡魔不能留難菩薩摩訶薩，書深般若波羅蜜乃至修行？」佛言：「是佛力故，惡魔不能留難菩薩摩訶薩，書深般若波羅蜜乃至修行。舍利弗，亦是十方世界現在諸佛力故，是諸佛擁護念是菩薩故，令魔不能留難菩薩摩訶薩，令不書成般若波羅蜜乃至修行。何以故？十方世界中，現在無量無邊阿僧祇諸佛，擁護念是菩薩，書深般若波羅蜜乃至

修行法應爾，無能作留難。舍利弗！善男子、善女人，應當作是念：我書是深般若波羅蜜，乃至修行，皆是十方諸佛力。」

舍利弗言：「世尊！若有善男子、善女人，書是深般若波羅蜜，乃至修行，皆是佛力，故當知是人，是諸佛所護。」佛言：「如是如是！舍利弗！當知若有善男子、善女人，書是深般若波羅蜜，乃至修行，皆是佛力，故當知亦是諸佛所護。」舍利弗言：「世尊！十方現在無量無邊阿僧祇諸佛，皆識，皆以佛眼見是善男子、善女人，書深般若波羅蜜，乃至修行時。」佛言：「如是如是！舍利弗！十方現在無量無邊阿僧祇諸佛，皆識，皆以佛眼見是善男子、善女人，書深般若波羅蜜，乃至修行時。舍利弗！是中求菩薩道善男子、善女人，若書是深般若波羅蜜，受持、讀誦，正憶念，如說修行，當知是人，近阿

2491

耨多羅三藐三菩提不久。舍利弗！善男子、善女人，書是深般若波羅蜜，受持、讀誦，乃至正憶念，是人於深般若波羅蜜多信解相，亦供養恭敬，尊重讚歎，是深般若波羅蜜華香瓔珞，乃至幡蓋供養。舍利弗！諸佛皆識，皆以佛眼見是善男子、善女人，是善男子、善女人，供養功德，當得大利益、大果報。舍利弗！是善男子、善女人，以是供養功德因緣故，終不墮惡道中，乃至阿耨跋致地，終不遠離諸佛。舍利弗！是善男子、善女人，以是善根因緣故，乃至阿耨多羅三藐三菩提，終不遠離六波羅蜜，終不遠離內空，乃至無法有法空，終不遠離四念處，乃至八聖道分，終不遠離佛十力，乃至阿耨多羅三藐三菩提。」

2492

論釋曰：上段講文末五行，應移於此釋目下。留難者，魔事等壞般若波羅蜜因緣。佛可須苦

提所說。若善男子、善女人欲書是般若波羅蜜，當疾疾書，乃至正憶念如說行時，疾修行。所以疾者，是有爲法不可信，多有留難起。是般若波羅蜜部黨經卷，有多有少，有上中下，光讚、放光、道行有書寫者，書有遲疾，有一心勤書者，有懈惰不精勤者，人身無常有爲法不可信。釋迦文佛出惡世故，多有留難，是故說若可一月書竟，當勤書成，莫有中廢，畏有留難故，乃至一歲。如書乃至修行亦如是。隨人根利鈍，得有遲疾。此中佛更說因緣：世間以珍寶故，多有賊出，般若即是珍寶，故多有留難。留難者，雖有疾病、飢餓等，但以魔事大故，說言魔事。若魔若魔民、惡鬼，作惡因緣，入人身中，擾亂人心，破書般若，或令書人疲厭，或令國土事起，或書人不得供養，如是等。讀誦時，師徒不和合，大衆中說時，或有人來說法師

過罪，或言不能如說行，何足聽受？或言雖能持戒，而復鈍根，不解深義，聽其所說，了無所益。或說般若波羅蜜空無所有，滅一切法，無可行處。譬如裸人自言我著天衣。如是等留難，令不得說。不正憶念者，魔作好身，若善知識，或作所敬信沙門形，爲說般若波羅蜜空無所有，雖有罪福名而無道理。或說般若波羅蜜空，可即取涅槃。如是等破修佛道正憶念事。

新發意菩薩聞是事，心大驚怖。我等生死身，魔是欲界主，威勢甚大，我等云何行般若波羅蜜得無上道？是故佛說：惡魔雖欲留難，亦不能破壞。何以故？大因緣常能破小故。如離欲人常勝貪欲者，慈悲人常勝瞋恚者，智人常勝無智者。般若波羅蜜是真智慧，其力甚大，魔事虛誑，是菩薩雖未得具足般若波羅蜜，得其氣分故。

魔不能壞。是事因緣故，舍利弗白佛：誰力故魔不能破？佛答：佛力故。如惡人中魔爲大，善人中佛爲大；縛人中魔爲大，解人中佛爲大；留難人中魔爲大，通達人中佛爲大。初說佛力者，釋迦文佛後說十方現在佛，是餘佛阿閼阿彌陀等。如惡賊餘惡相助，諸佛法亦如是，常爲一切衆生故，有發意者便爲作護。所以者何？般若波羅蜜是十方諸佛母，人欲沮壞，不得不護。應當知其有書讀，乃至正憶念者，皆是十方佛力，是諸留難力大故。

舍利弗言：若有書持乃至修行，皆是諸佛所護，佛可其言。舍利弗復說：世尊書持等善男子、善女人，十方現在諸佛皆以佛眼見知念耶？佛可言如是：先惡魔來破壞，佛及十方諸佛守護，不令沮壞。今以佛眼見是善男子、善女人，知是人功德難有，未破魔網而能

行是般若波羅蜜大事，是故十方佛以佛眼見知念是人。問曰：爲以天眼見，以佛眼見？若以天眼見，云何此中說佛眼？若以佛眼，衆生虛誑，云何以佛眼見？答曰：天眼有二種：一者佛眼所攝，二者不攝。佛眼所不攝者，見現在衆生，有限有量；佛眼所攝者，見三世衆生，無限無量。法眼入佛眼中，但見諸法，不見衆生；慧眼入佛眼中，不見法，但見畢竟空。問曰：佛眼所攝天眼，爲實爲虛妄？若虛妄，佛不應以虛妄見。若實者，衆生空，現在衆生尚不實，何況未來過去？答曰：佛眼所攝皆是實。衆生於涅槃是虛妄，非於世界所見是虛妄。若人於衆生取定相故，說言虛妄，非爲世諦故說虛妄。以是故，佛眼所攝天眼，見衆生。問曰：若爾者，何以不以佛眼所攝慧眼見衆生？答曰：慧眼無相利故，慧眼常以空無相，無作共相應，不中觀

衆生何以故？五衆和合假名衆生。譬如小兒，可以小杖鞭之，不可與大杖。此中讚菩薩行般若波羅蜜，爲世諦故說，非第一義諦。問曰：未來世未有念知，尚難，何況眼見？答曰：如過去法，雖滅無所有，而心數法中念力，故能憶過去事，盡其宿命。聖人亦如是，有聖智力，雖未起而能知能見。復次，是般若中，三世無分別，未來過去現在不異，若見現在過去未來亦應見，若不見過去未來，亦不應見。現在問曰：北方末法衆生，漏結未盡，是罪惡人，佛何以故見知念？答曰：佛大悲相，愛徹骨髓，是菩薩能發無上道心，爲衆生故。佛觀是法末後熾盛，我涅槃後，是人佐助佛法故，是以念知。復次，北方末後人生於邊地惡世，三毒熾盛，刀兵劫中，賢聖希少，是人自不知諸罪福業因緣，但從人聞，若讀經，便能信樂供養，疾近無上道。

不久，是事爲難！若佛在世，作阿鞞跋致，信行般若波羅蜜，不足爲難。如是等種種無量因緣故，佛應見念知。是人信解相大，故能供養般若波羅蜜。供養具華香等，如先說。是供養故得大果報，如毀譽者受大苦惱。大果報者，如須陀洹終不墮三惡道。是菩薩一心信解，供養般若波羅蜜，亦如是愛念諸佛故，常行念佛三昧，故終不離諸佛，乃至到阿鞞跋致地，教化衆生，離諸佛無咎。如小兒不離其母，恐墮諸難故，常深愛念善法故，乃至阿耨多羅三藐三菩提，終不離六波羅蜜等，得如是等今世後世大果報。

圖「舍利弗！是深般若波羅蜜，佛般涅槃後，當至南方，是中比丘，比丘尼，優婆塞，優婆夷，當書是深般若波羅蜜，當受持讀誦，思惟說，正憶念修行，以是善根因緣故，終不墮惡道中，受天上人中樂。」

增益六波羅蜜，供養恭敬，尊重讚歎諸佛，漸以聲聞、辟支佛、佛乘而得涅槃。舍利弗！是深般若波羅蜜，從南方當轉至西方所在處，是中比丘、比丘尼、優婆塞、優婆夷當書是深般若波羅蜜，當受持、讀誦、思惟、說、正憶念、修行，以是善根因緣故，終不墮惡道中，受天上人中樂。增益六波羅蜜，供養恭敬，尊重讚歎諸佛，漸以聲聞、辟支佛、佛乘而得涅槃。舍利弗！是深般若波羅蜜，從西方當轉至北方所在處，是中比丘、比丘尼、優婆塞、優婆夷當書是深般若波羅蜜，當受持、讀誦、思惟、說、正憶念、修行，以是善根因緣故，終不墮惡道中，受天上人中樂。增益六波羅蜜，供養恭敬，尊重讚歎諸佛，漸以聲聞、辟支佛、佛乘而得涅槃。舍利弗！是深般若波羅蜜，是時北方當作佛事。何以故？舍利弗！我法盛時，無有滅相。舍利弗！我已念

2499

是善男子、善女人，受是深般若波羅蜜，乃至修行，亦念是善男子、善女人，能書是般若波羅蜜，恭敬供養，尊重讚歎，華香乃至旛蓋。舍利弗！是善男子、善女人，以是善根因緣故，終不墮惡道中，受天上人中樂。增益六波羅蜜，供養恭敬，尊重讚歎諸佛，漸以聲聞、辟支佛、佛乘而得涅槃。何以故？舍利弗！我以佛眼見是人，我亦稱譽讚歎。十方世界中，無量無邊阿僧祇諸佛，亦以佛眼見是人，亦稱譽讚歎。舍利弗白佛言：「世尊是深般若波羅蜜，後時當在北方廣行耶？」佛言：「如是！如是！舍利弗！是深般若波羅蜜，後時在北方當廣行。舍利弗！後時於北方，是善男子、善女人，若聞是深般若波羅蜜，若書受持、讀誦、思惟、說、正憶念、如說修行，當知是善男子、善女人，久發大乘心，多供養諸佛，種善根久，與善知識相隨。」

2500

舍利弗白佛言：「世尊！後時北方，當有幾所善男子、善女人求佛道，書深般若波羅蜜，乃至如說修行？」佛告舍利弗：「後時北方，雖多有求佛道善男子、善女人，少有聞是深般若波羅蜜，不沒不驚、不怖、不畏。何以故？是人多親近供養諸佛，多諮問諸佛，是人必能具足般若波羅蜜、禪波羅蜜、毗梨耶波羅蜜、羼提波羅蜜、尸羅波羅蜜、檀波羅蜜，具足四念處，乃至具足十八不共法。舍利弗！是善男子、善女人，善根純熟，故能多利益衆生，爲阿耨多羅三藐三菩提。何以故？我今爲是善男子、善女人，說應薩婆若法，過去諸佛亦爲是善男子、善女人，說應薩婆若法。以是因緣故，是人後生時，續得阿耨多羅三藐三菩提心，亦爲他人說阿耨多羅三藐三菩提法。是善男子、善女人，皆一心和合，魔若魔民，不能沮壞阿耨多

羅三藐三菩提心，何況惡行人毀訾行深般若波羅蜜者，能壞其阿耨多羅三藐三菩提心！舍利弗！是求菩薩道諸善男子、善女人，聞是深般若波羅蜜，大得法喜法樂，亦立多人於善根，爲阿耨多羅三藐三菩提。」

釋曰：是深般若波羅蜜，佛滅度後，當至南方國土者。佛出東方，於中說般若波羅蜜，破魔及魔民、外道，度無量衆生，然後於拘夷那竭雙樹下滅度。後般若波羅蜜，從東方至南方，如日月、五星、二十八宿，常從東方至南方，從南方至西方，從西方至北方，圍遶須彌山。又如供養常法，右遶，應徧度閻浮提人，以是因緣故，從東方至南方，從南方至西方。如佛無著心故，不定一處般若波羅蜜，亦如是，不定住一處。從西方至北方，二方衆生，好供養、書讀，乃至修

行華香乃至旛蓋受大果報如經中說。後展轉至北方此中供養所得果報如上說。舍利弗是般若波羅蜜北方當作佛事。是中說因緣佛在時能斷衆疑佛法興盛不畏法滅佛滅後過五百歲正法漸滅是時佛事轉難。是時利根者讀誦正憶念亦華香供養鈍根者書寫華香等供養是二種人久久皆當得度故說當作佛事。佛言是善男子善女人我及十方諸佛皆以佛眼見念知讚歎。舍利弗白佛言是深般若在北方廣行耶廣行者於閻浮提北方廣大故。又北方地有雪山雪山冷故藥草能殺諸毒所食米穀三毒不能大發。三毒不能大發故衆生柔輒信等五根皆得勢力。如是等因緣北方多行般若波羅蜜是人聞是深般若波羅蜜書持乃至正憶念如說行當知是人久發大乘意多供養佛種善根與善

知識相隨是故能於惡世書持信受乃至如說修行舍利弗問北方有幾許人聞是深般若波羅蜜能書讀誦乃至如說修行佛答是深般若難知難行雖多有人發無上道心得名菩薩少有人聞是般若波羅蜜心通達不驚不沒心通達不驚不怖相佛此中自說。是人多親近諸佛親近諸佛者於無量世常見諸佛恭敬供養問難者直問其事疑心不解重種種問名爲難是人世世從諸佛問難般若波羅蜜事是人功德果報雖未成當知是人具足六波羅蜜三十七品乃至十八不共法具足是福德純熟故多利益衆生。所謂檀波羅蜜尸羅波羅蜜因緣故生於富貴家自行布施教人布施。羼提波羅蜜禪波羅蜜因緣故令無量衆生出家受戒發阿耨多羅三藐三菩提心。此中佛說因緣是人從我及過去諸佛

聞應薩婆若大乘法，是故後生不失是心，是人亦教化他人，說如是事。如然一燈展轉皆然。是人諸煩惱薄，無慳貪嫉妬瞋恚，故不相讒謗，常一心和合。是故魔若魔民，不能沮壞。若人少有錯，故魔得其便。如人有瘡受毒，魔是欲界王，尚不能沮壞，何況惡行人！或有人惡行而非惡，如未離欲聖人，以是故說惡人行毀譽般若波羅蜜，毀壞菩薩。復次，諸善男子、善女人，無量世來愛佛法，深著實法，信力、慧力多，故聞深般若波羅蜜，得大慈悲心，故隨衆生力，令入深般若波羅蜜，若令得般若因緣，所謂布施持戒等諸善根，爲阿耨多羅三藐三菩提故者，是善男子、善女人求無上道，故教他令生諸善根福德。

經「是善男子、善女人，於我前立誓願，我行菩薩道時，當度無數

百千萬億衆生，令發阿耨多羅三藐三菩提心，示教利喜，乃至阿鞞跋致地受記。我知其心，亦隨喜。是善男子、善女人，亦於過去諸佛前立誓願，我行菩薩道時，當度無數百千萬億衆生，令發阿耨多羅三藐三菩提心，示教利喜，乃至阿鞞跋致地受記。諸過去佛，亦知其心而隨喜。舍利弗，是諸善男子、善女人所爲心大，所受色、聲、香味、觸法亦大，亦能大施，能大施已，種大善根，種大善根已，得大果報，爲攝衆生故，受身能於衆生中捨內外所有物，以是善根因緣，發願欲生他方世界，現在諸佛說深般若波羅蜜處，於諸佛前，聞是深般若波羅蜜已，亦於彼示教利喜，百千萬億衆生，令發阿耨多羅三藐三菩提心。」舍利弗白佛言：「希有世尊，佛於過去未來現在法，無法不知，無法如相不知，衆生之行無事不知，今

佛悉知過去諸佛及菩薩聲聞，亦如今現在十方諸佛世界菩薩及聲聞，亦知未來諸佛及菩薩聲聞。世尊未來世有善男子善女人，勤求六波羅蜜，受持、讀誦乃至修行，有得有不得。」佛告舍利弗：「若善男子善女人一心精進勤求，當得應六波羅蜜諸經。」舍利弗白佛言：「善男子善女人如是勤行者，當得是應六波羅蜜深經耶？」佛語舍利弗：「是善男子善女人得是應六波羅蜜深經，何以故？善男子善女人爲阿耨多羅三藐三菩提故，與衆生說法，示教利喜，令住六波羅蜜中。以是因緣故，是善男子善女人後身轉生，易得應六波羅蜜深經，得已如六波羅蜜所說修行，精勤不息，乃至淨佛世界，成就衆生，得阿耨多羅三藐三菩提。」

論釋曰：佛說善男子善女人於我前及過去諸佛前立誓願，我行

菩薩道當令無量百千萬億衆生發無上道意，示教利喜，令得阿鞞跋致。我及過去佛，知是善男子心大能有所作，故隨喜。善男子善女人聞佛知其心，則生歡喜，自念過去作誓願事，倍加精進。大心者，一切衆生心，皆樂緣六塵，有人行雜福德，所謂作福時心生疑悔，是福德果報，雖得富貴，不能好用，亦不能與他，罪業因緣故，諸根闇鈍，不擇好醜。是善男子未得道時，清淨福德，故得上妙五欲，能盡意用，亦能隨意施與，或施窮乏，或種於福田。若得善知識，聞佛法，著欲心息，憐愍衆生，爲阿耨多羅三藐三菩提故，內外所有布施，無所愛惜。若持戒，徧行十善道，具戒律儀，以慈悲心共行。餘善法亦如是，皆以深心自行，及引導他人，令行善道。是福德因緣故，不求世樂，天王人王，富貴處，聞有現在佛處，願往生彼。是

菩薩知諸法實相故不樂生若爲衆生，生十方佛前，聞深般若波羅蜜。聞已於彼開化無量百千衆生，發無上道心。舍利弗無一切智，聞說三世菩薩願行事，發希有心，白佛言：世尊！佛於三世中無法不知；從如法性實際無不知者；諸衆生心所行業，果報因緣，無事不知；從十方現在諸佛及過去未來世佛，及世界弟子及所行事，皆悉徧知。佛一切智，其力甚大，不可思議。舍利弗意謂：同是出家人，俱求般若波羅蜜，何以故有得有不得者？佛答：若是菩薩常一心求六波羅蜜，不惜身命，是人內有好心，外諸佛菩薩及諸天所護助故。舍利弗意：雖復精進，佛不在世，魔力復大，是菩薩云何得是般若波羅蜜深經？是故更問得是應六波羅蜜深經。佛言：得此中說得因緣，所謂善男子、善女人爲無上道故，爲衆生說法，示

2509

教、利、喜，令住六波羅蜜，開佛道。是業果報故，轉身易得應六波羅蜜深經。若得能疾受持，乃至如所說修行，精進不捨，世世常不離。用六波羅蜜果報故，淨佛世界，成就衆生，乃至無上道。若吝惜法，則常生邊地無佛法處。

大智度論卷六十七

校譌

第五面第二行真第二十五面第十行生

音釋

裸魯果切 赤體也 沮在呂切 壞也 譌徒舉切 謬也

2510

大智度論卷第六十八

龍樹菩薩造

姚秦三藏法師鳩摩羅什譯

釋魔事品第四十六

爾時，慧命須菩提白佛言：「世尊是善男子、善女人，發阿耨多羅三藐三菩提心，行六波羅蜜，成就衆生，淨佛世界，佛已讚歎說其功德。世尊云何善男子、善女人，求於佛道，生諸留難？」佛告須菩提：「樂說辯不即生，當知是菩薩魔事。」須菩提言：「世尊何因緣故，樂說辯不即生，是菩薩魔事？」佛言：「有菩薩摩訶薩，行般若波羅蜜時，難具足六波羅蜜，以是因緣故，樂說辯不即生，是菩薩魔事。復次，須菩提，樂說辯卒起，當知亦是菩薩魔事。」世尊

2511

大智度論卷六十八 釋魔事品第四十六

大智度論卷六十八 釋魔事品第四十六

何因緣故，樂說辯卒起，復是魔事？」佛言：「菩薩摩訶薩，行檀波羅蜜乃至般若波羅蜜，著樂說法，以是因緣故，樂說辯卒起，當知是菩薩魔事。復次，須菩提，書是般若波羅蜜經時，偃蹇傲慢，當知是菩薩魔事。復次，須菩提，書是經時，戲笑亂心，當知是菩薩魔事。復次，須菩提，若書是經時，輕笑不敬，當知是菩薩魔事。復次，須菩提，若書是經時，心亂不定，當知是菩薩魔事。復次，須菩提，若書是經時，各各不和合，當知是菩薩魔事。復次，須菩提，善男子、善女人，作是念，我不得是經中滋味，便棄捨去，當知是菩薩魔事。復次，須菩提，受持般若波羅蜜，讀誦說，若正憶念時，偃蹇傲慢，當知是菩薩魔事。復次，須菩提，若受持般若波羅蜜經，親近正憶念時，轉相形笑，當知是菩薩魔事。復次，須菩提，若受持般若波羅蜜經，讀誦

2512

正憶念，修行時，共相輕憊，當知是菩薩魔事。若受持般若波羅蜜，讀誦乃至正憶念時，散亂心，當知是菩薩魔事。若受持般若波羅蜜，讀誦乃至正憶念時，心不和合，當知是菩薩魔事。」須菩提白佛言：「世尊，世尊說善男子、善女人作是念，我不得經中滋味，便棄捨去，當知是菩薩魔事。世尊何因緣故，菩薩不得經中滋味，便棄捨去？」佛言：「是菩薩摩訶薩，前世不久行般若波羅蜜、禪波羅蜜、毗梨耶波羅蜜、羼提波羅蜜、尸羅波羅蜜、檀波羅蜜，是人聞說是般若波羅蜜，便從座起，作是念言：我於般若波羅蜜中無記，心不清淨，便從座起去，當知是菩薩魔事。」須菩提白佛言：「世尊，何因緣故，不與授記，聞說是深般若波羅蜜時，便從座起去？」佛告須菩提：「若菩薩未入法位中，諸佛不與授阿耨多羅三藐

2513

三菩提。復次，須菩提，聞說般若波羅蜜時，菩薩作是念：我是中無名字，心不清淨，當知是菩薩魔事。」須菩提言：「何因緣故，是深般若波羅蜜中，不說是菩薩名字？」佛言：「未受記菩薩，諸佛不說名字。復次，須菩提，是菩薩摩訶薩作是念：是般若波羅蜜中，無我生處名字，若聚落城邑，是人不欲聽聞般若波羅蜜，便從會中起去。是人如所起念時，念念卻一劫，甫當更勤精進，求阿耨多羅三藐三菩提。」

2514

論釋曰：一切有爲法，各有增上。增上者，共相違，相違即是怨賊。如水得增上力滅火，火得增上力則消水，乃至草木各有相害，何況衆生。菩薩摩訶薩有大悲心，雖不與衆生作怨，而衆生與菩薩作怨。菩薩身有爲法故，能作留難。佛上說菩薩功德，所謂諸佛、菩薩。

諸天所護，而未說怨賊相。以佛憐愍故，先雖略說，今須菩提請，佛廣說留難事。佛雖於一切衆生、一切法心平等，以是菩薩能大利益世間，故說好醜相及利害，是道非道留難事。佛不令人毀害留難者，但令覺知，不隨其事。何者是怨賊？略說若衆生法，非衆生法，能沮壞菩薩無上道心。非衆生者，若疾病、飢渴、寒熱、推壓、墜落等。衆生者，魔及魔民、惡鬼、邪疑不信者，斷善根者，定有所得者，實定分別諸法者，深著世間樂者，怨賊、官事、師子、虎狼、惡獸、毒蟲等。衆生賊有二種，若內若外。內者，自從心生憂愁，不得法味，生邪見、疑悔、不信等；外者，如上說。如是諸難事，佛總名爲魔。魔有四種：煩惱魔、五衆魔、死魔、天子魔。煩惱魔者，所謂百八煩惱等，分別八萬四千諸煩惱。五衆魔者是煩惱業和合因緣，得是身四大及四大

2515

造色、眼根等色，是名色衆；百八煩惱等諸受和合，名爲受衆；小大、無量、無所有、想、分別和合，名爲想衆；因好醜心，發能起貪欲、瞋恚等心，相應、不相應法，名爲行衆；六情、六塵和合，故生六識，是六識分別，和合無量無邊心，是名識衆。死魔者，無常因緣，故破相續五衆壽命，盡離三法，識斷壽故，名爲死魔。天子魔者，欲界主，深著世間樂，用有所得，故生邪見、憎嫉一切賢聖涅槃道法，是名天子魔。魔，秦言能奪命者。唯死魔實能奪命，餘者亦能作奪命因緣，亦奪智慧命，是故名殺者。問曰：一五衆魔，攝三種魔，何以故別說？四答曰：實是一魔，分別其義，故有四。煩惱魔者，人因貪欲、瞋恚故死，亦能作奪命因緣，是近奪命因緣，故別說。天子魔，雜福德業因緣，故力勢大，邪見力故能奪慧命，亦能作死因緣，是故別說。無常死力

2516

大一切無能免者，甚可畏厭故別說。問曰：是魔何以惱亂行道者？答曰：先已廣說，是品中皆有四種魔義，但隨處說。復次，三魔不相遠離，若有五衆，則有煩惱，有煩惱則天魔得其便，五衆煩惱和合故有天魔。是故須菩提問佛：上已讚歎說菩薩功德，今云何是菩薩魔事起？佛答：樂說辯不即生，是爲魔事者，若菩薩摩訶薩憐愍衆生故，高座說法而樂說辯不生，聽者憂愁我等故來，而法師不說。或作是念：法師怖畏故不能說；或言不知故不說；或自惟過咎深重故不說；或謂不得供養故不肯說；或謂輕賤我等故不說；或串樂故不說。如是等種種因緣，聽者心壞故，以不樂說名爲魔事。復次，是菩薩憐愍衆生故，來欲說法，聽者欲聞，法師心生欲說，而口不能言，現見是魔事。如魔入阿難心，佛三問而三不答，久乃說

者，此中須菩提問世尊：何因緣故辯不即生？佛答：菩薩行六波羅蜜時，難具足六波羅蜜，所以者何？是人先世因緣故，鈍根懈怠，魔得其便，不一心行六波羅蜜故，樂說辯不即生。問曰：如樂說辯不即生，是魔事，今樂說辯卒起，何以復是魔事？答曰：是法師愛法著法，求名聲故，自恣樂說，無有義理，如逸馬難制，又如大水暴漲，衆穢渾雜。是故此中佛自說：菩薩行六波羅蜜著樂說法，是爲魔事。復次，是般若波羅蜜爲破憍慢故出，而書是經者，生我心憍慢，憍慢故身亦高，所謂偃蹇傲慢，書是般若波羅蜜時，用輕心、瞋心、戲笑不敬。復次，是般若波羅蜜若一心攝心，猶尙難得，何況散亂心書？書時從人口受，或寫經卷，若一心和合則得，若授者不與，如是等種種因緣，是不和合。復次，觀看是般若經時，品品皆空，無可樂

處。作是念：我於是經不得滋味，便棄捨去。般若波羅蜜是一切諸樂根本，此人不得其味，是爲魔事。復次，受持、讀誦、說、正憶念時，偃蹇形笑，散亂心不和合，如上說。共相輕賤者，從人受讀誦，正憶念時，師徒互相輕賤，書寫經時，但有捨去，無相輕賤，以是故無。問曰：上事中，何以但問不得經中滋味，不問餘者？答曰：般若波羅蜜，聖人所說，與凡人說異，是故凡夫人不得滋味。須菩提意謂：般若波羅蜜是清淨珍寶，聚能利益衆生，無有過惡，是人云何不得滋味？佛答：是人先世不久行六波羅蜜，故菩薩信等五根薄，故不能信。空、無相、無作、無依止法，憍亂心起，作是言：佛一切智，何以不與我授記？便捨去。餘者易解，故不問。須菩提問：若爾者，何以故不與授記？佛是大悲，應當愍念，防護其心，不令墮惡。佛言：未入法位人，諸

2519

佛不與授記。所以者何？諸佛雖悉知衆生久遠事，爲五通仙人及諸天，見人未有善行業，因緣可授記，若爲授記，輕佛不信，無有因緣，云何與授記？是故入法位者，與授記。是人名字及聚落處，亦如是。是人從座起去，隨其起念多少，念念卻一劫，償罪畢，還得人身，甫當復爾所劫行。

■「復次，須菩提！菩薩學餘經，棄捨般若波羅蜜，終不能至薩婆。若善男子、善女人，爲捨其根而攀枝葉，當知亦是菩薩魔事。」須菩提白佛言：「世尊！何等是餘經？善男子、善女人所學不能至薩婆者？」佛言：「是聲聞所應行經，所謂四念處、四正勤、四如意足、五根、五力、七覺分、八聖道分、空、無相、無作解脫門。善男子、善女人住是中，得須陀洹果、斯陀含果、阿那含果、阿羅漢果，是名聲聞所行。」

2520

不能至薩婆若。如是善男子、善女人捨般若波羅蜜，親近是餘經。何以故？須菩提！般若波羅蜜中，出生諸菩薩摩訶薩，成就世間、出世間法。須菩提！菩薩摩訶薩學般若波羅蜜時，亦學世間、出世間法。須菩提！譬如狗不從大家求食，反從作務者索。如是，須菩提！當來世有善男子、善女人棄深般若波羅蜜，而攀枝葉聲聞、辟支佛所應行經，當知是爲菩薩魔事。須菩提！譬如有人欲得見象，見已反觀其跡，須菩提！於汝意云何？是人爲黠不？須菩提言：「爲不黠。」佛言：「諸求佛道善男子、善女人，亦復如是，得深般若波羅蜜棄捨去，取聲聞、辟支佛所應行經，須菩提！當知是爲菩薩魔事。須菩提！譬如人欲見大海，反求牛跡水，作是念：『大海水能與此等不？』須菩提！於汝意云何？是人爲黠不？須菩提言：「爲不黠。」佛

2521

言：「當來世有求佛道善男子、善女人，亦如是，得深般若波羅蜜棄捨去，取聲聞、辟支佛所應行經，當知是亦菩薩摩訶薩魔事。須菩提！譬如工匠，若工匠弟子，欲擬作釋提桓因勝殿，而揆則日月宮殿，須菩提！於汝意云何？是人爲黠不？須菩提言：「爲不黠。」如是，須菩提！當來世有薄福德善男子、善女人求佛道者，得是深般若波羅蜜棄捨去，於聲聞、辟支佛所應行經中求薩婆若，須菩提！於汝意云何？是人爲黠不？須菩提言：「爲不黠。」佛言：「當知亦是菩薩魔事。須菩提！譬如有人欲見轉輪聖王，見而不識，後見諸小國王，取其相貌，如是言：『轉輪聖王與此何異？』須菩提！於汝意云何？是人爲黠不？須菩提言：「爲不黠。」須菩提！當來世有薄福德善男子、善女人求佛道者，得是深般若波羅蜜棄捨去，取聲

2522

聞辟支佛所應行經持求薩婆若。須菩提！於汝意云何？是人爲黠不？須菩提言：「爲不黠。」當知是爲菩薩魔事。須菩提！譬如飢人得百味食棄捨去，反食六十日穀飯。須菩提！於汝意云何？是人爲黠不？須菩提言：「爲不黠。」佛言：「當來世有求佛道善男子、善女人，得聞深般若波羅蜜棄捨去，取聲聞、辟支佛所應行經，持求薩婆若。於汝意云何？是人爲黠不？須菩提言：「爲不黠。」當知是亦菩薩魔事。須菩提！譬如人得無價摩尼珠，反持比水精珠。須菩提！於汝意云何？是人爲黠不？須菩提言：「爲不黠。」佛言：「當來世有求佛道善男子、善女人，得聞深般若波羅蜜棄捨去，取聲聞、辟支佛所應行經，持求薩婆若。是人爲黠不？須菩提言：「爲不黠。」當知是亦菩薩魔事。」

「復次，須菩提！求佛道善男子、善女人，書是深般若波羅蜜時，樂說不如法事，不得書成般若波羅蜜。所謂樂說色聲香味觸法，樂說持戒、禪定、無色定，樂說檀波羅蜜乃至般若波羅蜜，樂說四念處乃至阿耨多羅三藐三菩提。何以故？須菩提！是般若波羅蜜中，無樂說相。須菩提！般若波羅蜜不可思議相，般若波羅蜜不生不滅相，般若波羅蜜不垢不淨相，般若波羅蜜不亂不散相，般若波羅蜜無說無示相，般若波羅蜜無言無義相，般若波羅蜜無所得相。何以故？須菩提！般若波羅蜜中，無是諸法相。須菩提！若有善男子、善女人求菩薩道者，書是般若波羅蜜經時，以是諸法散亂心，當知是亦菩薩魔事。」須菩提白佛言：「世尊！是般若波羅蜜可書耶？」佛言：「不可書。何以故？般若波羅蜜自性無故。禪波羅蜜、

毗梨耶波羅蜜、羼提波羅蜜、尸羅波羅蜜、檀波羅蜜，乃至一切種智，自性無故。若自性無，是不名爲性，無法不能書無法。須菩提！若求菩薩道善男子、善女人，作是念無法是深般若波羅蜜，當知即是菩薩魔事。「世尊！是求菩薩道善男子、善女人，用文字書般若波羅蜜，自念我書是般若波羅蜜，以字著般若波羅蜜，當知亦是菩薩魔事。何以故？世尊！是般若波羅蜜無文字，禪波羅蜜、毗梨耶波羅蜜、羼提波羅蜜、尸羅波羅蜜、檀波羅蜜，無有文字。世尊！色無文字，受、想、行、識，無文字，乃至一切種智，無文字。世尊！若求菩薩道善男子、善女人，著無文字般若波羅蜜，乃至著無文字一切種智，當知亦是菩薩魔事。讀誦、說、正憶念，如說修行，亦如是。」復次，須菩提！求佛道善男子、善女人，書般若波羅蜜時，若國土念起，聚落

2525

念起，城邑念起，方念起。若聞謗毀，其師念起，若念父母及兄弟姊妹諸餘親里，若念賊，若念旃陀羅，若念衆女，若念淫女，如是等種種諸餘異念留難，惡魔復益其念，破壞書般若波羅蜜，破壞讀誦、說、正憶念，如說修行。須菩提！當知是亦魔事。復次，須菩提！求佛道善男子、善女人，得名譽恭敬，布施供養，所謂衣服、飲食、臥牀、疾藥種種樂具，善男子、善女人，書是般若波羅蜜經，受持讀誦，乃至正憶念時，愛著是事，不得書成般若波羅蜜，乃至正憶念，當知是亦菩薩魔事。復次，須菩提！求佛道善男子、善女人，書般若波羅蜜，乃至如說修行時，惡魔方便持諸餘深經，與是菩薩摩訶薩，有方便者，不應貪著惡魔所與諸餘深經。何以故？是經不能令人至薩婆若故。是中無方便菩薩摩訶薩，聞是諸餘深經，便捨深般若波羅

2526

蜜須菩提！我是般若波羅蜜中廣說諸菩薩摩訶薩方便道。諸菩薩摩訶薩應當從是中求須菩提。今善男子善女人求菩薩道捨是深般若波羅蜜於魔所與聲聞辟支佛深經中求方便道當知亦是菩薩魔事。」

論釋曰：學餘經捨般若波羅蜜等。有人於聲聞師會中受戒學法初不聞般若波羅蜜。或時餘處聞深著先所學法捨般若波羅蜜於先所學法中求薩婆若。有聲聞弟子先得般若波羅蜜不知義趣不得滋味以聲聞經行菩薩道。有人是聲聞弟子得般若波羅蜜經欲信受餘聲聞人沮壞其心。語言是經初後不相應無有定相汝宜捨之聲聞法中何所不有。六足阿毗曇及其論議分別諸法相。即是般若波羅蜜。八十部律即是尸羅波羅蜜。阿毗曇中分

2527

別諸禪解脫諸三昧等是禪波羅蜜。三藏本生中讚歎解脫布施忍辱精進即是三波羅蜜。如是等種種因緣捨般若波羅蜜於聲聞經中求薩婆若。如人欲得堅實好木捨其根莖而取枝葉。雖是木名而不中用。復次般若波羅蜜是三藏根本得般若波羅蜜已爲度衆生故說餘事是故名枝葉。復次聲聞經中雖說諸法實相而不了了。般若波羅蜜經中分明顯現易見易得。如人攀緣枝葉則墜落若捉莖榦則堅固。若執聲聞經則墮小乘中。若持般若波羅蜜易得無上道。是故說捨根莖取枝葉。問曰：三十七品三解脫門般若經中亦有。今何以故但名聲聞辟支佛經。答曰：摩訶衍中雖有是法與畢竟空合。心無所著以不捨薩婆若大悲心爲一切衆生故說。聲聞經則不爾爲小乘證故。復次菩薩行般若波羅蜜

2528

故能成就世間、出世間法。是故菩薩若求佛，應當學般若波羅蜜。譬如狗爲主守備，應從主索食，而反於奴客求。菩薩亦如是。狗喻行者，般若波羅蜜喻主人。般若中有種種利益，而捨求餘經。佛欲令分明易見，故說譬喻。象大海帝釋殿，轉輪聖王，無價寶，亦如是。問曰：五欲生五蓋，以五蓋覆智慧故，不應樂說。何以故樂說餘六波羅蜜，乃至無上道，而言不如法？答曰：不如法者，不如般若波羅蜜實相。般若波羅蜜實相中，無定相法，云何可樂說？若有定相，則心著樂說。諸佛及菩薩，以大悲心故，爲衆生說法，不著語言，用無所得法，示衆生畢竟空相。般若波羅蜜，是人書、讀、誦等，以染著心取六塵相，乃至無上道，故言不如法。問曰：若般若波羅蜜畢竟空，無所有法，不可書、讀、誦等，如是，則不應有魔事？答曰：畢竟空無所

2529

有，亦非般若波羅蜜相。何以故是魔事？此中說：若是人知無所有，是般若波羅蜜相，即是魔事。若用文字書般若波羅蜜，自知我書般若波羅蜜，有此著心，即是魔事。若人知般若波羅蜜相，不以著心書、讀、誦等，若有來破者，是爲破般若波羅蜜。復次，內有煩惱魔，外有天子魔，是二事因緣，故書般若波羅蜜，乃至修行時，壞般若波羅蜜。念起者，所謂念此國土不安隱，彼國土豐樂，聚落城邑，方亦如是。或聞誘毀其師，捨般若波羅蜜，欲助師除滅惡名。或聞父母疾病、官事，或念賊恐怖，欲發心詣餘處，旃陀羅亦如是。與賊、旃陀羅共住，則發瞋恚；與衆女、淫女共住，故淫欲心發。如是等種種因緣，破壞般若波羅蜜。菩薩覺知，當莫念、莫說。或書般若波羅蜜時，鈍根者於多恭敬供養事中，愛著自念我能書，能隨行，故有是

2530

著，是利養即是魔事。或有利根者，魔或思惟是菩薩不著世間樂，一心受般若波羅蜜，此人不可沮壞，我今當以聲聞深經轉其心，使成阿羅漢。佛言：聲聞經雖深，不應貪著，譬如燒然金丸，色雖妙，不可捉。若菩薩無方便，不大利根，得是經歡喜，是空、無相、無作，盡苦本，何復過是！便捨般若波羅蜜，亦是魔事。何以故？此中佛說因緣，於般若波羅蜜中，廣說諸菩薩摩訶薩方便道，所謂觀聲聞、辟支佛道而不證，以大悲心行三解脫門故。譬如人以酥和毒，毒勢則歇，不能害人。般若亦如是，菩薩於般若中，求無上道，易得；於餘經則難，如但服毒，是故不應從聲聞經中求菩薩道。

釋兩不和合品第四十七之上釋作兩不和合過品

經「復次，須菩提！聽法人欲書持般若波羅蜜，讀誦、問義、正憶念；

說法人懈惰，不欲為說，當知是菩薩摩訶薩魔事，須菩提！說法之人心不懈惰，欲令書持般若波羅蜜，聽法者不欲受之，二心不和，當知是為魔事。復次，須菩提！聽法人若欲書持般若波羅蜜，讀誦乃至正憶念，說法者欲至他方，當知是為魔事。須菩提！說法人欲令書持般若波羅蜜，聽法者欲至他方，二心不和，當知是為魔事。復次，須菩提！說法人貴重布施、衣服、飲食、臥具、醫藥、資生之物，聽法人少欲知足，行遠離行，攝念精進，一心智慧，兩不和合，不得書般若波羅蜜，受持、讀誦、問義、正憶念，當知是為魔事。須菩提！說法人少欲知足，行遠離行，攝念精進，一心智慧，聽法者貴重布施、衣服、飲食、臥具、醫藥、資生之物，兩不和合，不得書持般若波羅蜜，讀誦、問義、正憶念，當知是為魔事。復次，須菩提！說法者受十二頭陀；

一、作阿蘭若；二、常乞食；三、納衣；四、一坐食；五、節量食；六、中後不飲漿；七、冢間住；八、樹下住；九、露地住；十、常坐不臥；十一、次第乞食；十二、但三衣。聽法人不受十二頭陀，不作阿蘭若乃至不受但三衣，兩不和合，不得書持般若波羅蜜讀誦問義，正憶念當知是為魔事。須菩提！聽法者受十二頭陀，作阿蘭若乃至受但三衣，說法人不受十二頭陀，不作阿蘭若乃至不受但三衣，兩不和合，不得書持般若波羅蜜讀誦問義，正憶念當知是為魔事。」

論釋曰：一切有為法因緣和合故生，眾緣離則無，譬如鑽燧求火，有鑽有母，二事因緣得火。書寫般若乃至正憶念亦如是，內外因緣和合故生，所謂師弟子同心同事，故乃得書成。是故佛告須菩提：聽法人信等五善根發故，欲書持般若乃至正憶念，說法者五

蓋覆心故，不欲說。問曰：若五蓋覆心故，不欲說，何以作師？答曰：是人著世間樂，不觀空無常，雖能心知口說，不能自行，弟子雖必字疑欲行而不能知故，更無餘處，必語此人。或時師悲心發故，欲令書持般若，弟子信等五善根鈍，不發故，著世間樂故，不欲受書持，乃至正憶念。問曰：若不欲受持，何以名聽法者？答曰：少多聽受，讀誦不能究竟成就故，但名聽法。若二人善心共同，能得般若波羅蜜，若不同則不能得，是名魔事。內煩惱發，外天子魔作因緣，離是般若菩薩應覺是魔事，防令不起。若自失當具足，若弟子失當，教令得復次，師或慈悲心薄，捨弟子至他方，或不宜水土，四大不和，或善法無所增益，或水旱不適，或土地荒亂，如是等種種因緣，故至他方。弟子亦種種因緣，不能追隨。貴重利養者，如上五蓋覆心

等。復次，是二人皆有信、有戒，而一人以十二頭陀莊嚴戒，一人不能。問曰：一人何以故不能？答曰：佛所結戒，弟子受持。十二頭陀不名為戒，能行則戒莊嚴；不能行，不犯戒。譬如布施，能行則得福，不能行者無罪；頭陀亦如是，是故兩不和合，則是魔事。十二頭陀者，行者以居家多惱亂，故捨父母、妻子、眷屬，出家行道，而師徒、同學，還相結著，心復憍亂，是故受阿蘭若法，令身遠離慣鬧，住於空閑。遠離者，最近三里，能遠益善，得是身遠離已，亦當令心遠離五欲、五蓋。若受請食，若眾僧食，起諸漏因緣。所以者何？受請食者，若得，作是念：我是福德好人，故得；若不得，則嫌恨請者，彼為無所別識，不應請者請，應請者不請，或自鄙薄，懊惱自責，而生憂苦。是貪憂法，則能遮道。僧食者，入眾中，當隨眾法，斷事擯人料理僧事，處分

2535

作使，心則散亂，妨廢行道。有如是等惱亂事故，受常乞食法。好衣因緣故，四方追逐，墮邪命中。若受人好衣，則生親著，若不親著，檀越則恨。若僧中得衣，如上說眾中之過。又好衣，是未得道者生貪著處。好衣因緣，招致賊難，或至奪命。有如是等患，故受弊納衣法。行者作是念：求一食尚多有所妨，何況小食、中食、後食，若不自損，則失半日之功，不能一心行道。佛法為行道，故不為益身，如養馬、養豬，是故斷數數食，受一食法。有人雖一食，而貪心極，腹脹氣塞，妨廢行道，是故受節量食法。節量者，略說隨所能食，三分留一分，則身輕安隱，易消無患，於身無損，則行道無廢。如經中舍利弗說：我若食五口、六口，足之以水，則足支身。於秦人中食，可十口許。有人雖節量食，過中飲漿，則心生樂著，求種種漿、果漿、蜜漿等，求

2536

欲無厭，不能一心修習善法。如馬不著轡勒，左右噉草，不肯進路；若著轡勒，則噉草意斷，隨人意去，是故受中後不飲漿。無常、空觀，是入佛法初門，能厭離三界。冢間常有悲啼哭聲，死屍狼藉，眼見無常，後或火燒，鳥獸所食，不久滅盡。因是屍觀，一切法中易得無常相、空相。又冢間住，若見死屍臭爛不淨，易得九想觀，是離欲初門，是故受冢間住法。不淨、無常等觀已得，道事辦，捨至樹下，或未得道者，心則不大厭，取是相，樹下思惟。如佛生時、成道時、轉法輪時、般涅槃時，皆在樹下。行者隨諸佛法，常處樹下。如是等因緣，故受樹下坐法。行者或觀樹下如半舍無異，蔭覆涼樂，又生愛著，我所住者好，彼樹不如。如是等生漏故，至露地住。作是思惟：樹下有二種過：一者、雨漏溼冷；二者、鳥屎汗身，毒蟲所住。有如是等過，空

2537

地則無此患。露地住，則著衣、脫衣，隨意快樂。月光徧照，空中明淨，心易入空三昧。身四儀中，坐爲第一，食易消化，氣息調和。求道者大事未辦，諸煩惱賊常伺其便，不宜安臥。若行若立，則心動難攝，亦不可久，故受常坐法。若欲睡時，脇不著席。行者不著於味，不輕衆生等心憐愍故，次第乞食，不擇貧富故，受次第乞食法。行者少欲知足，衣趣蓋形不多不少故，受但三衣。白衣求樂故，多畜種種衣；或有外道苦行故，裸形無恥，是故佛弟子捨二邊，處中道行。住處、食處常用故事多，衣不須日日求，故略說。是十二頭陀，佛意欲令弟子隨道行，捨世樂，故讚十二頭陀。是佛意常以頭陀爲本，有因緣不得已而聽餘事。如轉法輪時，五比丘初得道，白佛言：我等著何等衣？佛言：應著納衣。又受戒法，盡壽著納衣，乞食樹下住，弊

2538

棄藥。於古四聖種中，頭陀即是三事。佛法唯以智慧爲本，不以苦爲先。是法皆助道，隨道故，諸佛常讚歎。

大智度論卷第六十八

校譌

第六面第五行斷末第廿二面三行一作之 （查實無有疑爲原稿之錯刻今照植存疑）
兩藏作熱 北藏作不

音釋

偃蹇偃於禮切蹇九件切偃蹇驕傲也 申古患切 黠胡八切 鑽鑽祖官切鑽徐辭切 煇鑽發穿木出火也 擯必刃切 鼻尺救切與鼻同厲氣也

大智度論卷第六十九

龍 樹 菩 薩 造

姚秦三藏法師鳩摩羅什譯

釋兩不和合品第四十七之下

經「復次，須菩提！說法者有信有善，欲書受深般若波羅蜜，乃至正憶念聽法者無信，破戒惡行，不欲書受深般若波羅蜜，乃至正憶念當知是爲魔事。須菩提！聽法者有信有善，說法者無信，破戒惡行，兩不和合當知是爲魔事。復次，須菩提！說法者能一切施，心不慳惜，聽法者吝惜不捨，當知是爲魔事。須菩提！聽法者一切能施，心不慳惜，說法者吝法不施，兩不和合，不得書持般若波羅蜜，乃至正憶念當知是爲魔事。復次，須菩提！聽法者欲供養說法人

衣服、飲食、臥具、醫藥、資生所須，說法者不欲受之，當知是為魔事。須菩提！說法者欲供給聽法人衣服，乃至資生所須，聽法者不欲受之，兩不和合，不得書持般若波羅蜜，乃至正憶念，當知是為魔事。復次，須菩提！說法者易悟，聽法人闇鈍，當知是為魔事。須菩提！聽法者易悟，說法人闇鈍，兩不和合，不得書持般若波羅蜜，乃至正憶念，當知是為魔事。復次，須菩提！說法者知十二部經次第義，所謂修妬路，乃至優波提舍，聽法者不知十二部經次第義，當知是為魔事。聽法者知十二部經次第義，說法人不知十二部經次第義，兩不和合，不得書深般若波羅蜜，乃至正憶念，當知是為魔事。復次，須菩提！說法者成就六波羅蜜，聽法者不成就六波羅蜜，兩不和合，不得書深般若波羅蜜，乃至正憶念，當知是為魔事。聽

2542

法者有六波羅蜜，說法人無六波羅蜜，兩不和合，不得書深般若波羅蜜，乃至正憶念，當知是為魔事。復次，須菩提！說法者於六波羅蜜有方便力，聽法人於六波羅蜜無方便力，兩不和合，不得書深般若波羅蜜，乃至正憶念，當知是為魔事。聽法者於六波羅蜜有方便力，說法人於六波羅蜜無方便力，兩不和合，不得書深般若波羅蜜，乃至正憶念，當知是為魔事。復次，須菩提！說法者得陀羅尼，聽法人無陀羅尼，兩不和合，不得書深般若波羅蜜，乃至正憶念，當知是為魔事。聽法者得陀羅尼，說法者無陀羅尼，兩不和合，不得書深般若波羅蜜，乃至正憶念，當知是為魔事。復次，須菩提！說法者欲令書持般若波羅蜜讀誦，乃至正憶念，聽法人不欲書持般若波羅蜜讀誦，乃至正憶念，兩不和合，不得書深般若波

2543

羅蜜乃至正憶念當知是爲魔事。聽法者欲書讀誦說般若波羅蜜說法者不欲令書般若波羅蜜乃至不欲令說兩不和合不得書深般若波羅蜜乃至正憶念當知是爲魔事。復次須菩提說法者離貪欲瞋恚睡眠掉悔疑聽法人貪欲瞋恚睡眠掉悔疑當知是爲魔事。聽法者離貪欲瞋恚睡眠掉悔疑說法人貪欲瞋恚睡眠掉悔疑兩不和合不得書深般若波羅蜜乃至正憶念當知是爲魔事。復次須菩提書是深般若波羅蜜乃至正憶念時或有人來說三惡道中苦劇汝何不於是身盡苦入涅槃何用是阿耨多羅三藐三菩提爲兩不和合不得書般若波羅蜜乃至正憶念當知是爲魔事。復次須菩提書是深般若波羅蜜受持讀誦說正憶念時或有人來讚四天王諸天讚三十三天夜摩天兜率陀天化

樂天他化自在天梵天乃至非有想非無想天讚初禪乃至非有想非無想定。作是言善男子欲界中受五欲快樂色界中受禪生樂無色界中受寂滅樂是事亦無常苦空無我變相盡相散相離相滅相。汝何不於是身中取須陀洹果斯陀含果阿那含果阿羅漢果辟支佛道何用是世間生死中受種種苦求阿耨多羅三藐三菩提爲兩不和合不得書深般若波羅蜜乃至正憶念當知是爲魔事。復次須菩提說法者一身無累自在無礙聽法人多將人衆兩不和合不得書深般若波羅蜜乃至正憶念當知是爲魔事。聽法者一身無累自在無礙說法者多將人衆兩不和合不得書深般若波羅蜜乃至正憶念當知是爲魔事。復次須菩提說法者如是言汝能隨我意者當與汝般若波羅蜜令書讀誦說正憶念

若不隨我意者，則不與汝。兩不和合，不得書深般若波羅蜜讀誦。說正憶念，當知是為魔事。復次，須菩提！聽法者欲得追隨如其意，說法者不聽，兩不和合，不得書深般若波羅蜜。乃至正憶念，當知是為魔事。復次，須菩提！說法者欲得財利故，與般若波羅蜜，令書持。乃至正憶念，聽法者以是因緣故，不欲從受，兩不和合，不得書深般若波羅蜜。乃至正憶念，當知是為魔事。聽法者為財利故，欲書深般若波羅蜜讀誦，說法者以是因緣故，不欲與，兩不和合，不得書深般若波羅蜜讀誦。說當知是為魔事。復次，須菩提！說法者欲至他方危命之處，聽法者不欲隨去，兩不和合，不得書深般若波羅蜜。乃至正憶念，當知是為魔事。聽法者欲至他方危命之處，說法者不欲去，兩不和合，不得書深般若波羅蜜。乃至正憶念，

2546

當知是為魔事。復次，須菩提！說法者欲至他方飢餓穀貴無水之處，聽法者不欲隨去，兩不和合，不得書深般若波羅蜜。乃至正憶念，當知是為魔事。聽法者欲至他方飢餓穀貴無水之處，說法者不欲去，兩不和合，不得書深般若波羅蜜。乃至正憶念，當知是為魔事。復次，須菩提！說法者欲至他方豐樂之處，聽法者欲隨從去，說法者言善男子！汝為利養故，追隨我，汝善自思惟，若得若不得，無令後悔。以是少因緣故，兩不和合。聽法者聞之心厭，作是念是為拒逆，不欲與我相隨，便止不去。兩不和合，不得書深般若波羅蜜。乃至正憶念，當知是為魔事。復次，須菩提！說法者欲過曠野，賊怖、旃陀羅怖、獵師怖、惡獸毒蛇怖，聽法者欲隨逐去。說法者言善男子！汝何用到彼中，多有諸怖，賊怖乃至毒蛇怖。聽法者聞之，

2547

知其不欲與般若波羅蜜書持乃至正憶念心厭不欲追隨。以是少因緣故兩不和合當知是為魔事。復次須菩提說法者多有禮越數往問訊。以是因緣故語聽法者：我有因緣應往到彼聽法人知其意便止兩不和合不得書深般若波羅蜜乃至正憶念當知是為魔事。」

問曰：有人書持讀誦般若波羅蜜不能行而犯戒，或可有是若不信云何從受法？答曰：是人不信般若波羅蜜所謂畢竟空，但欲求名故讀誦廣說，如佛弟子不信外道經書亦為人講說。復次不能深信樂般若故名不信，非都不信。問曰：弟子法應供養師奉諸所有何以言師不能施？答曰：弟子作是念：師少物不能捨，何況捨身雖讚說布施，是為欺誑，是故名不和合。弟子欲以四事供養

2548

師，師少欲知足故不受，或羞愧似如賈法故不受。或師多知多識，無所乏少能供給弟子。弟子自念：人當謂我貪師衣食故受法，或自以德薄不消所給，此心雖好不能成般若故，亦是魔事。師鈍根者是誦經師，非解義師。十二部經亦是誦經師。復次有六波羅蜜者，作是念：弟子罪人鈍根不能行六波羅蜜著世間事，但有弟子名無有實事，是師不知弟子聞般若已後成大事，但以現前無六波羅蜜不肯教化。弟子亦作是念：六波羅蜜義我亦能行，師但能口說不能修行，不知師轉身因緣當成大事，又不知師別有讀誦利益因緣故不和合。復次弟子直信著善法，師不著法，以方便行六波羅蜜，弟子謂為不深樂六波羅蜜，何以知之？師或時讚歎六波羅蜜，或時斷人著故，破散六波羅蜜，弟子有方便亦如是。問曰：

2549

若弟子得陀羅尼，師無陀羅尼，何以爲師？答曰：陀羅尼有種種，有弟子得聞持陀羅尼，能持能誦，不能解義，師能爲解說，弟子或能得諸法實相陀羅尼義，而不能次第誦讀。或師得聞持陀羅尼，未得大悲故，輕賤弟子，不能教道。問曰：弟子欲受持般若波羅蜜，師不與，或可有是？云何師欲與法，弟子不受？答曰：如先答，弟子見師有過故，不欲受法。復次，師欲教化前人爲弟子，而是人或邪見諸惡因緣故，不肯受教。復次，一切衆生所行法，同則和合，一人離五蓋，一人不離，故相輕相輕，故不和合。一切上法皆爾。復次，書誦般若波羅蜜，乃至正憶念時，一人誦三惡道，一人讚歎諸天，是事如先答。雖不能都破其善行，但壞其大乘，授小乘法。復次，師少欲知足，不樂衆聚，弟子多有人衆，師作是念：弟子雖好可度，而將徒衆

多。師深著善法，捨離弟子，弟子一身亦如是。復次，說法者意若弟子隨我意行，若去若住，隨時問訊，如是等聽法者，但欲從求法利，不能行此衆事，是不和合。或時聽法者，隨意進止，問訊等說法者不聽，作是念：何用是事，損我功德！聽法者意謂輕賤，不相好喜，是不和合。復次，師爲利養故，欲與法，弟子心則不敬師，云何欲買經法？弟子亦如是，爲財利故，讀誦般若，非清淨心故。師知弟子心如是，則薄賤不與，故不和合。復次，師欲至他方，路經險難，弟子惜身命，故不能隨。作是念：我有身，然後求法，弟子欲去，亦如是。飢餓、穀貴、無水處，亦如是。復次，師欲至豐樂處，弟子欲隨師，或羞愧不欲將去，或弟子串樂，不任涉遠，或道里懸遠，或師諳彼國，弟子不悉，謂師稱美彼國，不必實爾，或慮師謂貪飲食，故去。如是等種種因

緣師語弟子：如汝所聞彼國土所有，不必盡爾，好自籌量。若自欲去者便去，無以財物豐樂故去，至彼不得隨意，勿以見怨。師復爲說：汝聞彼國土豐樂故去，非爲法故，不須隨我。師好心止弟子，不知是壞般若波羅蜜因緣。弟子聞是說，敬難師，故不能答，便止不去。故不和合。師復欲至遠國，彼中有種種虎狼賊盜，語弟子言：彼間多難，汝不須去。弟子聞已便止。師但知彼有難事，故止弟子，不知是壞般若波羅蜜因緣。問曰：若遠國多難，何以自去？答曰：有人言：師彼國生，故服習彼土，能自防護。有人言：彼有好師經書，不惜身命故去。師作是念：我身自死則可，云何枉他。如是等因緣故，止弟子不令去。師多有知識檀越，心生樂著，弟子少欲知足，不著檀越。師常隨時問訊檀越，弟子但欲求法，不喜是事。師知其意，語言：

2552

我有因緣，不得爲汝說法。弟子聞已不悅。師貴俗緣，不貴於法，是不和合。

經「復次，須菩提！惡魔作比丘形像來，方便破壞般若波羅蜜，不得令書持讀誦說，正憶念。」須菩提白佛言：「世尊！何因緣故，惡魔作比丘形像方便破壞般若波羅蜜，不得令書持乃至正憶念？」佛言：「惡魔作比丘形像來，壞善男子、善女人心，令遠離般若波羅蜜。作是言：如我所說經，即是般若波羅蜜，此經非般若波羅蜜。須菩提！是中破壞諸比丘時，有未受記菩薩，便墮疑，墮疑故不書深般若波羅蜜，不受不持，乃至不作正憶念，不和合，不得書成般若波羅蜜，乃至正憶念，當知是爲魔事。復次，須菩提！惡魔作比丘身到菩薩所，作如是言：若菩薩行般若波羅蜜於實際作證，得須

2553

陀洹果、斯陀含果、阿那含果、阿羅漢果，得辟支佛道，以是不和合，不得書深般若波羅蜜，乃至正憶念，當知是為魔事。復次，須菩提！說是深般若波羅蜜時，多有魔事起，留難般若波羅蜜，是為魔事。菩薩摩訶薩應當覺知，知已遠離。須菩提言：「世尊！何等是魔事留難？菩薩應當覺知，知已遠離。」佛言：「似般若波羅蜜諸魔事起，似禪波羅蜜、似毗梨耶波羅蜜、似羼提波羅蜜、似尸羅波羅蜜、似檀波羅蜜，魔事起，菩薩應當覺知，知已遠離。復次，須菩提！聲聞、辟支佛所應行經，是菩薩摩訶薩應當知是魔事而遠離之。復次，須菩提！內空乃至無法有法空，四念處乃至八聖道分，空無相，無作解脫門，用是法得須陀洹果、斯陀含果、阿那含果、阿羅漢果，辟支佛道，如是等諸經，惡魔作比丘形像，方便與菩薩摩訶薩是

不和合故，不得書深般若波羅蜜，乃至正憶念，當知是為魔事。復次，須菩提！惡魔作佛身金色丈光，到菩薩所，是菩薩貪著因緣，故耗減薩婆若，是不和合故，不得書般若波羅蜜，乃至正憶念，當知是為魔事。復次，須菩提！惡魔作佛身及比丘僧，到菩薩前，是菩薩起貪著意，作是念：我於當來世亦當如是作比丘僧，為說法，是菩薩貪著魔身故，耗減薩婆若，不得書成般若波羅蜜，乃至正憶念，當知是為魔事。復次，須菩提！惡魔化作無數百千萬億菩薩行檀波羅蜜、尸羅波羅蜜、羼提波羅蜜、毗梨耶波羅蜜、禪波羅蜜、般若波羅蜜，指示善男子、善女人，善男子、善女人見已，貪著貪著，故耗減薩婆若，不得書般若波羅蜜，乃至正憶念，當知是為魔事。何以故？是深般若波羅蜜中，無有色、無有受、想、行、識，乃至無有阿耨多

羅三藐三菩提。須菩提！般若波羅蜜，若無有色，乃至無阿耨多羅三藐三菩提，是中無佛，無聲聞，無辟支佛，無菩薩。何以故？一切諸法自性空故。復次，須菩提！善男子、善女人，書是深般若波羅蜜，受讀誦說，正憶念時，多有留難起。須菩提！譬如閻浮提中珍寶金銀、琉璃、砗磲、瑪瑙、珊瑚等寶，多難多賊。如是，須菩提！善男子、善女人，書是深般若波羅蜜，乃至正憶念時，多賊多留難起。須菩提白佛言：「如是！世尊！閻浮提中珍寶金銀、琉璃、砗磲、瑪瑙、珊瑚等多賊多難，世尊！善男子、善女人亦如是，書是深般若波羅蜜，乃至正憶念時，多賊多留難起，多有魔事。何以故？是愚癡人，為魔所使。善男子、善女人，書是深般若波羅蜜，乃至正憶念時，破壞令遠離世尊，是愚癡人，少智少慧。是善男子、善女人，書般若波羅蜜，乃至正

2556

憶念時，破壞令遠離。是愚癡人，心不樂大法，是故不書是深般若波羅蜜，不受不讀不誦，不正憶念，不如說修行，亦壞他人，令不得書深般若波羅蜜，乃至如說修行。佛言：「如是！如是！須菩提！新發大乘意，善男子、善女人，為魔所使，不種善根，不供養諸佛，不隨善知識，故不書深般若波羅蜜，乃至不正憶念而作留難。是善男子、善女人，少智少慧，心不樂大法，是故不能書是深般若波羅蜜，乃至正憶念，魔事起。故須菩提！若善男子、善女人，能書是深般若波羅蜜，乃至正憶念時，魔事不起，能具足禪波羅蜜，乃至檀波羅蜜，能具足四念處，乃至一切種智。須菩提！當知佛力故，是善男子、善女人，能書是深般若波羅蜜，乃至正憶念，亦能具足禪波羅蜜，乃至檀波羅蜜，內空乃至無法有法空，具足四念處，乃至八聖道

2557

分佛十力乃至一切種智。須菩提十方現在無量無邊阿僧祇諸佛亦助是善男子善女人令得書是深般若波羅蜜乃至正憶念十方阿鞞跋致諸菩薩摩訶薩亦擁護祐助是善男子善女人書般若波羅蜜乃至正憶念。」

論釋曰：魔作大沙門形有重威德令人受其語多持經卷與眾弟子俱語諸比丘般若波羅蜜如我經所說真實佛語汝先聞者不實非佛所說訶毀先經種種自讚所說鈍根菩薩信受是語生邪見若利根未得受記者生疑何以故諸佛畢竟空無相智慧難解故不和合。或時魔語菩薩般若波羅蜜三解脫門廣說但是空汝常習此空於中得證不得證云何作佛作佛法先行布施持戒等修三十二相福德坐道場時爾乃用空菩薩或信或疑離般若波

2558

羅蜜。問曰云何似六波羅蜜名魔事。答曰如相似般若波羅蜜中說。復次以著心行六波羅蜜是名似。聲聞辟支佛經無有慈悲不求佛道但欲自度雖是好事破菩薩道故名魔事。問曰若菩薩見佛身則信心清淨云何名魔事。答曰一切煩惱取相皆是魔事。是小菩薩未應見佛身魔作佛妙形菩薩心著為是好身故行道如未離欲人見天女形深心染著不能堪受天欲迷悶而死是故魔願得滿菩薩雖得少淨心而失實相智慧如人手捉重寶有人以少金誑之捨大價寶而取賤物是名耗滅。魔作佛身將諸比丘示多菩薩行六波羅蜜亦如上。此中佛說因緣色等一切法自性空。復次眾會生疑般若波羅蜜是無上法多有利益云何有人憎嫉是故佛說譬喻如閻浮提金銀等多怨多賊為是故出不為瓦石

2559

等生。般若波羅蜜是佛法藏中妙寶，微妙甚深，懈怠鈍根者所不解，是故訾毀。魔以般若波羅蜜多令衆生入涅槃故，魔作怨賊。須菩提喜受佛教，述其所說毀訾破壞般若者。世尊是狂癡之人為魔所使，不得自在，以少智故，不能通達佛意。是人無有大心，不知清淨法味，但知三相貪味淫欲瞋恚，如畜生法，與般若波羅蜜生留難。佛可須菩提所說語須菩提。若菩薩摩訶薩書般若乃至正憶念，魔事不起，當知是佛力，亦是十方諸佛及諸菩薩所擁護，而能具足五波羅蜜乃至一切種智，亦是十方現在佛力。何以故？魔是欲界主，世間福德智慧具足，魔是世間生死根本。色界諸天雖有邪見，常入禪定，故心柔輒，不能有所破壞。無色界中無形故，又心微細，不能有所作。下諸天無有力勢故，不能如是破壞。是魔先

2560

世業因緣力，又住處因緣，他作奪取，是中賊主名為魔，是魔相爾。
「相爾，疑為法爾。」破壞好事。初發心菩薩福德智慧薄，故惜身，若十方諸佛菩薩不擁護佐助者不能成。是故諸佛菩薩諸天為破壞魔事，是菩薩或覺或不覺，如賊遶城，大人守護，小兒不覺。略說魔事如是。廣說則無量無邊。然佛意但欲令行者成般若大事，是故師徒宜應和合，一切惡事不應計念。

釋佛母品第四十八之上

佛告須菩提：「譬如母人有子若五，若十，若二十，若三十，若四十，若五十，若百，若千。母中得病，諸子各各勤求救療，作是念：我等云何令母得安，無諸患苦不樂之事。風寒冷熱，蚊蟲蛇虻，侵犯母身，是我等憂。其諸子等常求樂具，供養其母，所以者何？生育我等，

2561

示我世間。如是須菩提！佛常以佛眼視是深般若波羅蜜。何以故？是深般若波羅蜜能示世間相。十方現在諸佛亦以佛眼常視是深般若波羅蜜。何以故？是深般若波羅蜜能生諸佛，能與諸佛一切智，能示世間相。以是故，諸佛常以佛眼視是深般若波羅蜜。又以般若波羅蜜能生禪波羅蜜乃至檀波羅蜜，能生內空乃至無法有法空，能生四念處乃至八聖道分，能生佛十力乃至一切種智。般若波羅蜜能生須陀洹、斯陀含、阿那含、阿羅漢、辟支佛、諸佛。須菩提！所有諸佛已得阿耨多羅三藐三菩提，今得當得，皆因深般若波羅蜜因緣故得。須菩提！若求佛道善男子、善女人，書是深般若波羅蜜，乃至正憶念，諸佛常以佛眼視是人。須菩提！是求菩薩道善男子、善女人，諸十方佛常守護，令不退阿耨多羅三藐三

菩提。須菩提白佛言：「如世尊所說般若波羅蜜能生諸佛，能示世間相。世尊般若波羅蜜云何能生諸佛？云何能示世間相？云何諸佛從般若波羅蜜生？云何諸佛說世間相？」佛告須菩提：「是深般若波羅蜜中生佛十力乃至十八不共法，一切種智。須菩提！得是諸法，故名爲佛。須菩提！以是故深般若波羅蜜能生諸佛。須菩提！諸佛說五衆是世間相。」須菩提言：「世尊！云何深般若波羅蜜中說五衆相？云何深般若波羅蜜中示五衆？」須菩提！般若波羅蜜不示五衆，破不示壞，不示生，不示滅，不示垢，不示淨，不示增，不示減，不示入，不示出，不示過去，不示未來，不示現在。何以故？空相不破，不壞，無相相，無作相，不破，不壞相，如是示不起法，不生法，無所有法，性法，不破，不壞相，如是示。如是須菩提！佛說深般若

波羅蜜能示世間相。」

「復次須菩提！諸佛因深般若波羅蜜，悉知無量無邊阿僧祇衆生心所行。須菩提！是深般若波羅蜜中無衆生，無衆生名，無色，無色名，無受，想，行，識，無受，想，行，識名，無眼，乃至無意，無眼識，乃至無意識，無眼觸，乃至無意觸，乃至無一切種智，無一切種智名。如是須菩提！是深般若波羅蜜能示世間相。須菩提！是深般若波羅蜜亦不示色，不示受，想，行，識，乃至不示一切種智。何以故？須菩提！是深般若波羅蜜中尚無般若波羅蜜，何況色乃至一切種智！復次，須菩提！所有衆生名數，若有色，若無色，若有想，若無想，若非有想，非無想，若此間世界，若徧十方世界，是諸衆生，若攝心，若亂心，是攝心，亂心，佛如實知。須菩提！云何佛知衆生攝心，亂心相？以法相

2564

故知。用何等法相故知？須菩提！是法相中尚無法相，何況有攝心，亂心？須菩提！以是法相，故佛知衆生攝心，亂心。復次，須菩提！佛知衆生攝心，亂心，云何？須菩提！以盡相故知，以無染相故知，以滅相故知，以斷相故知，以寂相故知，以離相故知。如是，須菩提！佛因般若波羅蜜，知衆生攝心，亂心。復次，須菩提！佛因般若波羅蜜，知衆生染心，如實知染心，瞋心，癡心，如實知瞋心，癡心。」須菩提白佛言：「世尊云何佛知衆生染心，如實知染心，瞋心，癡心，如實知瞋心，癡心？」佛告須菩提：「染心如實相，則無染心相。何以故？如實相中心心數法不可得，何況當得染心不染心？須菩提！瞋心，癡心如實相，則無瞋，無癡相。何以故？如實相中心心數法尚不可得，何況當得瞋心不瞋心，癡心不癡心？如是，須菩提！佛因般若波

2565

羅蜜，衆生染心，如實知染心。瞋心，癡心，如實知瞋心，癡心。復次，須
 菩提佛因般若波羅蜜，衆生無染心，如實知無染心。無瞋心，無癡
 心，如實知無瞋心，無癡心。須菩提白佛言：「世尊云何衆生無
 染心，如實知無染心。無瞋心，如實知無瞋心。無癡心，如實知無癡
 心。」佛告須菩提：「是心無染相中，染相不染相不可得。何以故，
 須菩提！二心不俱故。如是，須菩提！佛因般若波羅蜜，衆生無染心，
 如實知無染心。須菩提！是無瞋心，無癡心相中，癡心，不癡心不可
 得。何以故，二心不俱故。如是，須菩提！佛因般若波羅蜜，衆生無瞋
 心，無癡心，如實知。復次，須菩提！佛因般若波羅蜜，是衆生廣心，如
 實知廣心。」須菩提白佛言：「世尊云何佛因般若波羅蜜，是衆
 生廣心，如實知廣心。」須菩提！佛知諸衆生心相不廣不狹，不

2566

增不減，不來不去。心相離故，是心不廣乃至不來不去。何以故？是
 心性無故，誰作廣作狹，乃至來去亦如是。須菩提！佛因般若波羅
 蜜，是衆生廣心，如實知廣心。復次，須菩提！佛因般若波羅蜜，是衆
 生大心，如實知大心。」須菩提白佛言：「世尊云何佛因般若波
 羅蜜，是衆生大心，如實知大心。」佛告須菩提：「佛因般若波羅
 蜜，不見衆生心來相去相，不見衆生心生相滅相住相異相。何以
 故？是諸心性無故，誰來誰去誰生滅住異。如是，須菩提！佛因般若
 波羅蜜，是衆生大心，如實知大心。復次，須菩提！佛因般若波羅蜜，
 衆生無量心，如實知無量心。」須菩提白佛言：「世尊云何佛因
 般若波羅蜜，衆生無量心，如實知無量心。」佛告須菩提：「佛因
 般若波羅蜜，知是衆生心，不見住不見不住。何以故？是無量心相

2567

無依止故，誰有住不住處？如是，須菩提！佛因般若波羅蜜，衆生無量心，如實知無量心。復次，須菩提！佛因般若波羅蜜，衆生不可見心，如實知不可見心。」須菩提白佛言：「世尊！云何佛因般若波羅蜜，衆生不可見心，如實知不可見心？」佛告須菩提：「衆生心是無相，佛如實知無相，自相空故。復次，須菩提！佛知衆生心，五眼不能見。如是，須菩提！佛因般若波羅蜜，衆生不可見心，如實知不可見心。」

論釋曰：上說十方諸佛及大菩薩擁護般若波羅蜜，乃至正憶念，不令魔得其便。會中聽者聞是事已，或作是念：諸佛阿耨多羅三藐三菩提寂滅相，於諸法及衆生無憎無愛，何以故擁護書持般若，乃至正憶念者？是故佛告須菩提，爲說譬喻，如子知恩故，守護

其母。般若即是十方諸佛母故，若有魔等留難，欲破壞般若波羅蜜者，諸佛雖行寂滅相，憐愍衆生故，知恩分故，用慈悲心常念，用佛眼常見，守護是行般若者，令得增益，不失佛道。此中佛說因緣，諸賢聖及賢聖法，皆從般若中生。問曰：須菩提問四種，佛何以正答三事，而不說諸佛從般若中生？答曰：般若生諸佛，諸佛從般若生，義無異。有人言：諸法和合故能生般若波羅蜜，般若波羅蜜能生諸佛。有人行般若波羅蜜及衆行，得成佛。初謂作者，二謂法。若言墮枝殺人，若言墮樹殺人，以是事同，故不別答。若說般若波羅蜜能生諸佛，即說諸佛從般若生。問曰：如餘經說：五衆破壞，故名世間。此中何以言般若波羅蜜示五衆，無破壞、生滅等？答曰：彼是小乘事，此是大乘法。小乘法多說無常，大乘法中，多說法空。小乘法

中，先說無常，後說法空。大乘法中，初便說法空。小乘法中說無常，令衆生怖畏。大乘則不然，是故說無破壞等。此中佛自說因緣空、無相、無作，終不破壞。般若波羅蜜示如是等世間相。

復次，五衆名世間，衆生身形色易知，餘心數法無形故難知。是故佛語須菩提：無量阿僧祇衆生心所行皆知。深般若中雖無衆生及色等法，乃至一切種智，以般若方便力，而能知衆生心所行。是般若波羅蜜中畢竟空故，不示色等法，乃至一切種智。此中佛說因緣般若波羅蜜中尚無般若相，何況色等法。復次，般若波羅蜜示世間者，一切衆生，若色若無色。色者，欲色界衆生；無色者，無色界衆生。有想者，除無想天及非有想非無想天，餘者是有想。無想者，是無想衆生。非有想非無想者，是有頂處天。此間世界者，是三

2570

千大千世界徧十方者，餘無量無邊阿僧祇世界。是世界六道中三世衆生，佛悉知其攝心、亂心。須菩提聞已，心疑怪諸佛常樂行寂滅諸法空，今云何徧知無始無邊衆生攝心、亂心。佛心一衆生心無量種，云何一時知一切衆生心。以是故，問佛云何知。佛答諸法實相智慧故，知衆生攝心、亂心。須菩提問：何等是諸法實相。答曰：所謂畢竟空，是畢竟空。畢竟空性亦不可得，何況攝心、亂心。問曰：諸法實相畢竟空中，無分別心心數法。佛云何知其心。答曰：此中佛自說：諸法實相性亦不可得，以是智慧，知衆生攝心、亂心。何以故。若空性可得，應有難，空性不可得，云何作難。今佛過一切憶想分別虛妄法，安住實相，如實知一切衆生心。衆生心住虛妄法中故，不能知他衆生如實。先略說知他心，次分別衆生攝心、亂心。

2571

所謂三毒，無三毒者，廣大，無量，不可見，出沒屈伸等。須菩提事事問，初答以諸法實相故，知攝心、亂心。次以盡、無染、滅、斷、寂、離故，知盡者，無常慧，菩薩行是無常慧心，離一切世間染。用世間道遮滅結使，是名滅。用無漏道斷，故名斷。斷諸結使已，觀涅槃寂滅、離相。以是因緣，得諸法實相。以諸法實相，知他攝心、亂心皆是實相。復次，是心念念生滅，未來無故不可知，現在念念滅，住時無故不可知。凡夫人取相分別，於三世中憶想，妄見謂知心念。以盡門觀，即是畢竟空，畢竟空故無所著，是時得道。知諸法實相，於一切法不妄想分別，則如實知他心。染心者，一切法入法性中皆清淨，是故說染心實相，是中無染心。何以故？如實中無心，無心數法，何況染心、瞋心、癡心亦如是。無染心相中，是中無有染心相，染心從本來

2572

無故，亦無不染心。無染心是寂滅相，無所分別。此中佛自說因緣：須菩提！二心不俱故。眾生法，心心次第生，無染心時則無染心。何以故？過去染心已滅，未來未有，現在無染心，則無有染心。染心無故，亦無不染心，相待法無故。是故無染實相中無有染心、不染心。無瞋心、無癡心亦如是。廣狹增減心，皆是眾生取相分別，佛不如是知。何以故？是心無色無形，無住處，念念滅，則無廣狹增減差別。此中佛說因緣：心性相無故，廣狹等不可得。廣狹增減大小義，如四無量心中說。無量心者，廣心、大心，即是無量。又緣無量眾生故，名無量；又緣涅槃無量法故，名無量；又心相不可取故，名無量。如有眼、有色，因緣故，眼識生，是識不在眼，不在色，不在中間，不在此，不在彼，是故無住處。若實無住處，云何能有所作？若好若醜，如夢

2573

所見事，不可求其實定相。心亦如是，無依止故無定相，故名無量。廣大，亦應如是隨義分別說。問曰：若知心不可見，佛何以故說如實知不可見心？答曰：有坐禪人憶想分別，見是心如清淨珠中纒；觀白骨人中，見心次第相續生；或時見心在身，或見在緣，如無邊識處，但見識無量無邊，破如是等處虛妄故，佛言如實知衆生心，衆生心自相空，故無相相。復次，佛以五眼觀此心不可得。肉眼、天眼緣色故不見；慧眼緣涅槃故不見；初學法眼分別，知諸法善不善、有漏無漏等，是法眼入實相中則無分別；如先說，一切法無知者，無見者是，故不應見。佛眼觀寂滅相，故不應見。衆生心見者，如實見，不如凡夫人憶想分別見。復次，五眼因緣和合生，皆是作法，虛誑不實，佛不信不用，是故不以五眼見。大智度論卷第六十九

大智度論卷第七十

龍 樹 菩 薩 造

姚秦三藏法師鳩摩羅什譯

釋佛母品第四十八之下

經「復次，須菩提！佛因深般若波羅蜜，衆生心數出沒屈伸，如實知。」世尊云何佛因般若波羅蜜，衆生心數出沒屈伸，如實知？佛言：「一切衆生心數出沒屈伸等，皆依色、受、想、行、識生，須菩提！佛於是中知衆生心數出沒屈伸，所謂神及世間常是事實，餘妄語是見依色、神及世間無常是事實，餘妄語是見依色、神及世間常亦無常是事實，餘妄語是見依色、神及世間非常非無常是事實，餘妄語是見依色、神及世間常是事實，餘妄語是見依受、神及

世間無常是事實，餘妄語是見依受神及世間常亦無常是事實，
 餘妄語是見依受神及世間非常非無常是事實，餘妄語是見依
 受神及世間常是事實，餘妄語是見依想神及世間無常是事實，
 餘妄語是見依想神及世間常亦無常是事實，餘妄語是見依想
 神及世間非常非無常是事實，餘妄語是見依想神及世間常是
 事實，餘妄語是見依行神及世間無常是事實，餘妄語是見依行
 神及世間常亦無常是事實，餘妄語是見依行神及世間非常非
 無常是事實，餘妄語是見依行神及世間常是事實，餘妄語是見
 依識神及世間無常是事實，餘妄語是見依識神及世間常亦無
 常是事實，餘妄語是見依識神及世間非常非無常是事實，餘妄
 語是見依識。識下今刪去
十五字衍文世間有邊是事實，餘妄語是見依色世間無

2576

邊是事實，餘妄語是見依色世間有邊無邊是事實，餘妄語是見
 依色世間非有邊非無邊是事實，餘妄語是見依色依受想行識
 亦如是神即是身是見依色神異身異是見依色依受想行識亦
 如是死後有如去是事實，餘妄語是見依色死後無如去是事實，
 餘妄語是見依色死後或有如去或無如去是事實，餘妄語是見
 依色死後非有如去非無如去是事實，餘妄語是見依色依受想
 行識亦如是如是須菩提佛因般若波羅蜜衆生出沒屈伸如實
 知。

2577

「復次須菩提！佛知色相，云何知色相？如如不壞無分別，無相、無
 憶、無戲論、無得色相亦如是。須菩提！佛知受想行識相，云何知受
 想行識相？如如不壞無分別，無相、無憶、無戲論、無得受想行識相

亦如是如是須菩提！佛知衆生如相，及衆生心數出沒屈伸如相。是五衆如相，諸行如相，卽一切法如相。何等是一切法如相？所謂六波羅蜜如相，六波羅蜜如相卽是三十七品如相，三十七品如相卽是十八空如相，十八空如相卽是八背捨如相，八背捨如相卽是九次第定如相，九次第定如相卽是佛十力如相，佛十力如相卽是四無所畏、四無礙解、大慈大悲，乃至十八不共法如相。十八不共法如相卽是一切種智如相，一切種智如相卽是善法不善法、世間法出世間法、有漏法無漏法如相，有漏法無漏法如相卽是過去未來現在諸法如相，過去未來現在諸法如相卽是有爲法無爲法如相，有爲法無爲法如相卽是須陀洹果如相，須陀洹果如相卽是斯陀含果如相，斯陀含果如相卽是阿那含果如

相，阿那含果如相卽是阿羅漢果如相，阿羅漢果如相卽是辟支佛道如相，辟支佛道如相卽是阿耨多羅三藐三菩提如相，阿耨多羅三藐三菩提如相卽是諸佛如相。諸佛如相皆是一如相，不二不別，不盡不壞，是名一切諸法如相。佛因般若波羅蜜得是如相，以是因緣故，般若波羅蜜能生諸佛，能示世間相。如是須菩提！佛知一切法如相，非不如相，不異相，得是如相故，佛名如來。」須菩提白佛言：「世尊！是諸法如相，非不如相，不異相，甚深！世尊！諸佛用是如，爲人說阿耨多羅三藐三菩提。世尊！誰能信解是者？唯有阿鞞跋致菩薩，及具足正見人，漏盡阿羅漢，何以故？是法甚深故。」須菩提：「是如無盡相故甚深。」須菩提言：「何法無盡相故甚深？」佛言：「一切法無盡故。如是須菩提！佛得是一切諸法

如已爲衆生說」

論釋曰佛悉知一切衆生所作所行六十二邪見等諸邪見九十八結使等諸煩惱是故說佛知衆生心心數法出沒屈伸。在家者爲愛等諸煩惱所沒名爲沒九十六種邪見出家者名爲出復次常著世樂故名沒或知無常怖畏求道故名出復次受九十六種道法不能得正道故還沒在世間。屈者不離欲界伸者離欲界色界離不離亦如是。如人立清池上見魚或有常在水中或有暫出還沒或有出觀四方或有出欲渡者近岸還沒佛亦如是。以佛眼觀十方六道衆生有常著五欲諸煩惱覆心不求出者或有好心能布施能持戒而以邪疑覆心故還沒有人出五欲能得煖法頂法等觀四諦未得實法故還沒有人離欲乃至無所有處不得涅槃故還沒何等是出沒屈伸相此中佛說所謂神及世間常神者凡夫人憶想分別隨我心取相故計有神。外道說神有二種一者常二者無常若計神常者常修福德後受果報故或由行道故神得解脫若謂神無常者爲今世名利故有所作常無常者有人謂神有二種一者細微常住二者現有所作現有所作者身死時無常細神是常有人言神非常非無常常無常中俱有過若神無常即無罪福若神常亦無罪福何以故若常則苦樂不異譬如虛空雨不能溼風日不能乾若無常則苦樂變異譬如風雨在牛皮中則爛壞以我心故說必有神但非常非無常佛言四種邪見皆緣五衆但於五衆謬計爲神神及世間者世間有三種一者五衆世間二者衆生世間三者國土世間此中說二種世間五衆世間國

槃故還沒何等是出沒屈伸相此中佛說所謂神及世間常神者凡夫人憶想分別隨我心取相故計有神。外道說神有二種一者常二者無常若計神常者常修福德後受果報故或由行道故神得解脫若謂神無常者爲今世名利故有所作常無常者有人謂神有二種一者細微常住二者現有所作現有所作者身死時無常細神是常有人言神非常非無常常無常中俱有過若神無常即無罪福若神常亦無罪福何以故若常則苦樂不異譬如虛空雨不能溼風日不能乾若無常則苦樂變異譬如風雨在牛皮中則爛壞以我心故說必有神但非常非無常佛言四種邪見皆緣五衆但於五衆謬計爲神神及世間者世間有三種一者五衆世間二者衆生世間三者國土世間此中說二種世間五衆世間國

土世間；衆生世間即是神。於世間相中，亦有四種邪見。問曰：神從本已來無故，應錯世間是有，云何同神邪見？答曰：但破於世間起常無常相，不破世間。譬如無目人得蛇以爲嬰珞，有目人語是蛇，非是嬰珞。佛破世間常顛倒，不破世間。何以故？現見無常故。亦不得言無常，罪福不失故。因過去事有所作故。常無常二俱有過故。非常非無常，著世間過故。世間有邊者，有人求世間根本，不得其始，不得其始，則無中無後。若無初中後，則無世間。是故世間應有始，即是邊。得禪者宿命智力，乃見八萬劫事，過是已往，不復能知。但見身始中陰識，而自思惟：此識不應無因無緣，必應有因緣。宿命智所不能知，但憶想分別，有法名世性，非五情所知，極微細故。於世性中初生覺，覺即是中陰識。從覺生我，從我生五種微塵，所

謂色、聲、香、味、觸。從聲微塵生虛空大，從聲觸生風大，從色、聲、觸生火大，從色、聲、觸、味生水大，從色、聲、觸、味、香生地大。從空生耳根，從風生身根，從火生眼根，從水生舌根，從地生鼻根。如是等漸漸從細至粗。世性者，從世性已來至粗，從粗轉細，還至世性。譬如泥丸中具有瓶盆等性，以泥爲瓶，破瓶爲盆，如是轉變，都無所失。世性亦如是轉變爲粗。世性是常法，無所從來，如僧佉經廣說世性。復次，有人說：世間初邊名微塵，微塵常法不可破，不可燒，不可爛，不可壞，以微細故。但待罪、福、因緣和合，故有身。若天、若地獄等，以無父母故，罪、福、因緣盡則散壞。有人以自然爲世界始，貧富貴賤，非願行所得。有人言：天主即是世界始，造作吉凶禍福。天地萬物，此法滅時，天還攝取。如是邪因，是世界邊。有人說：衆生世世受苦樂

盡，自到邊。譬如山上投縷丸，縷盡自止，受罪受福，會歸於盡，精進、懈怠無異。有人說：國土世間，八方有邊，唯上下無邊。有人說：下至十八地獄，上至有頂，上下有邊，八方無邊。如是種種說世界邊。有人說：衆生世間有邊，如說神在體中，如芥子、如棗，或言一寸，大人則神大，小人則神小，說神是色法有分，故言神有邊。無邊者，有人說神徧滿虛空，無處不有，得身處能覺苦樂，是名神無邊。有人言：國土世間無始，若有始則無因緣，後亦無窮常受身，是則破涅槃，是名無邊。復次，說國土世間，十方無邊。如是等說神世間、國土世間無邊。有邊無邊者，有人言：神世間無邊，國土世間有邊，或言神世間有邊，國土世間無邊。如上說神是色故，或言上下有邊，八方無邊。如是總上二法，名爲有邊無邊。世間非有邊非無邊者，有人

見世間有邊有過，無邊亦有過，故不說有邊，不說無邊，著非有邊非無邊，以爲世間實。神即是身者，有人言：身即是神，所以者何？分析此身，求神不可得。復次，受好醜苦樂皆是身，是故言身即是神。身異神異者，有人言：神微細，五情所不得，亦非凡夫人所見。攝心清淨，得禪定人，乃能得見，是故言身異神異。復次，若身即是神，身滅神亦滅，是邪見。說身異神異，身滅神常在，是邊見。死後有如去者，問曰：先說常無常等，即是後世，或有或無，今何以別說如去。四句答曰：上總說一切世間常非常，後世有無事要，故別說如去者，如人來此間生，去至後世亦如是。有人言：先世無所從來，滅亦無所去。有人言：身神和合爲人，死後神去身不去，是名如去。不如去。非有如去非無如去者，見去不去有失，故說非去非不去。是人

不能捨神，而著非去非不去。如是諸邪見煩惱等，是名心出沒屈伸。所以者何？邪見者種種道求出不得故，欲出而沒邪見力多難解，故說常無常等十四事。

外道雖種種憶想分別，佛言皆緣五衆，依止五衆，無神、無常。佛知五衆空、無相、無作、無戲論，但知五衆如，不如凡夫虛誑顛倒見。如五衆如，一切法如亦如是。何以故？二法攝一切法，所謂有爲、無爲。五衆是有爲法，五衆如即是無爲法。觀察、籌量、思惟五衆能行六波羅蜜，是故說五衆如即是一切法如，一切法如即是六波羅蜜。如行六波羅蜜菩薩求實道，觀五衆無常、空、生三十七品、八背捨、九次第等，是聲聞道；知已直過，行十八空、十力等諸佛法，皆正觀五衆、五衆如，無分別故，皆是一切諸法如。是故說善法如即是不

2586

善法如，不善法如即是善法如。世間、出世間法亦如是。是以行者不得著善法，捨不善法，乃至阿耨多羅三藐三菩提，佛如相亦如是，皆是一如相，不二不別。所以者何？求諸法實，到畢竟空，無復異，如是等諸法如。佛因般若波羅蜜得，是故言般若波羅蜜能生諸佛，能示世間相。

須菩提歎未曾有，白佛言：世尊！一切諸法如甚深，隨順不相違。三世十方諸佛如，即是諸法如，解是諸法如故，爲衆生種種說法，是甚深如，難解難信。阿鞞跋致菩薩入法位受記者能信，具足正見人者，三道人漏盡阿羅漢不受一切法故能信，其有信者，近阿鞞跋致中，故不別說。佛語須菩提：一切法無盡故，是如無盡，如無盡故，得聖道者能信。無爲法中差別故，有須陀洹諸道，聞自所得法

2587

故能信。凡夫人著虛誑顛倒法，故不能信。佛告須菩提：諸佛得是諸法如故，名為如來，名為一切智人，能教衆生令至涅槃。

釋問相品第四十九

爾時三千大千世界中所有欲界天子、色界天子，遙散華香來至佛所，頂禮佛足，一面住。白佛言：「世尊所說般若波羅蜜甚深，何等是深般若波羅蜜相？」佛告欲界、色界諸天子：「諸天子，空相是般若波羅蜜相，無相、無作、無起、無生、無滅、無垢、無淨、無所有、法、無相、無依止、虛空相是般若波羅蜜相。諸天子，如是等相，是深般若波羅蜜相。佛為衆生用世間法，故說非第一義。諸天子，是諸相，一切世間天、人、阿修羅不能破壞，何以故？是一切世間天、人、阿修羅亦是相故。諸天子，相不能破相，相不能知相，相不能知無相，

2588

無相不能知相。是相，是無相，相、無相皆無所有，謂知、知者、知法皆不可得。何以故？諸天子，是諸相，非色、作、非受、想、行、識、作、非檀、波羅蜜、作、非尸羅、波羅蜜、羼提、波羅蜜、毗梨耶、波羅蜜、禪、波羅蜜、般若波羅蜜、作、非內空、作、非外空、作、非內外空、作、非無法空、作、非有法空、作、非無法有法空、作、非四念處、作、乃至非一切種智、作。諸天子，是諸相，非人所有，非非人所有，非世間，非出世間，非有漏，非無漏，非有為，非無為。」佛復告諸天子：「譬如有人問何等是虛空相，此人為正問不？」諸天子言：「世尊，此不正問，何以故？世尊是虛空，無相可說，虛空無為無起。」佛告欲界、色界諸天子：「有佛無佛，相性常住，佛得如實相性，故名為如來。」諸天子白佛言：「世尊，世尊所得諸相性甚深，得是相，故得無礙智，住是實相中，以般

2589

若波羅蜜集諸法自相。」諸天子言：「希有世尊是深般若波羅蜜是諸佛常所行處，行是道得阿耨多羅三藐三菩提，得阿耨多羅三藐三菩提已，通達一切法相，若色相，若受、想、行、識相，乃至一切種智相。」佛言：「如是如是，諸天子，惱壞相是色相，佛得是無相。覺者受相，取者想相，起作者行相，了別者識相，佛得是無相。能捨者檀波羅蜜相，無熱惱者尸羅波羅蜜相，不變異者羼提波羅蜜相，不可伏者毗梨耶波羅蜜相，攝心者禪波羅蜜相，捨離者般若波羅蜜相，佛得是無相。心無所燒惱者是四禪、四無量心、四無色定相，佛得是無相。出世間者三十七品相，佛得是無相。苦者無作脫門相，離者空脫門相，寂滅者無相脫門相，佛得是無相。勝者十力相，不恐怖者無所畏相，徧知者是無礙智相，餘人無得者十

2590

八不共法相，佛得是無相。愍念眾生者大慈大悲相，實者無謬錯相，無所取者常捨相，現了知者一切種智相，佛得是無相。如是諸天子，佛得一切諸法無相，以是因緣故，佛名無礙智。」

論問曰：上處處已說空無相、無作，乃至無起無所有是般若相。今諸天子何以復問何等是般若相？答曰：佛雖處處說般若波羅蜜，或說空等，或說有，或說果報，或說罪福，不定故，是以今問何者定是般若相。復次，是般若波羅蜜如幻化，如似可得而無定相可取，唯諸佛能正徧知其相，諸天雖有利智，不能了知，故問。復次，有人言：是諸天子有後來者不聞，故問。佛答諸天子：空等是般若波羅蜜相。空相者，內外空等諸空。若諸法空者，即是無有男女、長短、好醜等相，是名無相相。若空無相，不復生願著後世身，是名無作相。

2591

三解脫門是初入般若相，三乘共有。不生不滅，不垢不淨，無依止虛空等，是般若波羅蜜深相。上三脫門中無相，無男女等外相，無所有，下無相相，無一切法相。空雖是一人，根有利鈍，入有深淺故，差別說空。無生無滅等論議，如先說。佛知天子必有如是念，若般若波羅蜜空無所有，如虛空相，云何可說？若說即是有相。諸天子以佛威德大故，不敢致難，是故佛自爲說。佛憐愍衆生，以世諦故說空等諸相，非以第一義諦。若以第一義故應難以世諦故說，則不應難。復次，雖說空不以著心取相，不示法若是若非，一切法同一相，無分別，是故復了了說，所謂無所有如虛空相。無有一法不入此相者，是故說一切世間無能破壞。何以故？一切世間天、人、阿修羅即是相故。若異法相違，則有可破，如水能滅火，火不自滅火。

2592

口言如實欲破者竟不能破，何況不實者？譬如盲人踏踐珍寶，口言非珍寶竟不能令非珍寶。此中佛更說般若波羅蜜畢竟空無相故，相不能破。復次有人言相不能破相者，有法能解散諸法和合竟無所破，無所失，如斧析薪分解散竟無所失。復次，諸法無定相，如樹根、莖、枝、葉和合故名爲樹，樹無定相故無所破。如是等名爲相不能破相。問曰：色等諸法非覺故，可不相知？心數法是知相，云何言不知？答曰：此中以實相故，不說凡夫人虛妄知。是智慧，有爲法故，因緣和合生，虛妄法不能實有所知，是故捨入無餘涅槃。若智慧知常無常乃至空寂滅等，上來已廣破滅無所有。若如是者，云何當有知？以是故相不知相，相不能知無相者，內雖有智慧，外空故無法可知；外無緣云何智慧生？是故言相不能知無。

2593

相。譬如刀雖利，不能破空。無相不能知相者，有人言：內智慧無定相，外所緣法有定相，心隨緣而生，是故說無相不應知相。譬如無刀，雖有物，無刀可斫。是相、是無相、相、無相皆不可得者，相不入相，何以故？先有相故。相不入無相，何以故？相無入處故。離是相、無相，更無處可入。復次，相所相法不定故，因所相故有相。所以者何？若先有相，無所相者則無相，無所因故。若先有所相而無相者，云何有所相，無所因待故？復次，相以所相不定，相或時作所相，所相或時是相。是故相不定，不實故，所相亦無。若所相不定，不實故，相亦無。是故說是相、是無相，是相無相不可得。如先說空等諸相是實，何以故？是相非五衆所作，非六波羅蜜乃至一切種智所作。是相無爲故，無法可作，亦無若人若非人能作。人者，菩薩、諸佛等；非人

者，諸天等。是相畢竟空故，非有漏、非無漏、非世間、非出世間。先雖說無爲相，但破有爲故說無爲，無爲亦無定相。此中佛欲使是事明了，故說譬喻。聽者作是念：若無佛則不聞是相，佛於衆生最上故，應當作是相。是故佛語諸天：有佛無佛，此相常住。佛能知是相，故名爲佛。爾時諸天子歡喜，復白佛言：世尊，是諸相甚深，雖不可取相而可行，能與人無上果報。佛得是相故，於一切法得無礙智。若分別諸法有定相，則是有礙智。世尊住是諸法實相中，則通達無礙，能說諸法各各別相，所謂惱壞相是色相，乃至現了知者是。一切種智相。佛可其意，爲分別諸相。凡夫所知諸相各異，佛知皆是空相，空相即是無相，佛得是無相。得者是知無比徧知，故名得。是諸法相，今轉名般若波羅蜜故。

爾時，佛告須菩提：「般若波羅蜜是諸佛母。般若波羅蜜能示世間相。是故佛依止是法住，供養恭敬尊重讚歎是法。何等是法？所謂般若波羅蜜。諸佛依止般若波羅蜜住，恭敬供養尊重讚歎是般若波羅蜜。何以故？是般若波羅蜜出生諸佛。佛知作人。若人正問知作人者，正答無過於佛。何以故？須菩提！佛知作人故。佛所乘來法，佛所從來道，得阿耨多羅三藐三菩提。是乘是道，佛還恭敬供養尊重讚歎，受持守護。須菩提！是名佛知作人。復次，須菩提！佛知一切法無作相，作者無所有故。一切法無起，形事不可得故。須菩提！佛因般若波羅蜜知一切法無作相，亦以是因緣故。佛知作人。」

「復次，須菩提！佛因般若波羅蜜得一切法不生，以無所得故。以

是因緣故，般若波羅蜜能生諸佛，能示世間相。」須菩提言：「世尊！一切法無知者、無見者，云何般若波羅蜜能生諸佛，能示世間相？」佛告須菩提：「如是如是！一切法實無知者、無見者，云何無知者、無見者？一切法空虛，誰不堅固，是故一切法無知者、無見者。復次，須菩提！一切法云何無知者、無見者？一切法無依止，無所繫，以是故一切法無知者、無見者。如是，須菩提！般若波羅蜜能生諸佛，能示世間相。不見色故，示世間相；不見受、想、行、識故，示世間相；乃至不見一切種智故，示世間相。如是，須菩提！般若波羅蜜能生諸佛，能示世間相。」須菩提言：「世尊！云何不見色故，般若波羅蜜示世間相？不見受、想、行、識，乃至一切種智故，示世間相？」佛告須菩提：「若不緣色生識，是名不見色相故，示不緣受、想、行、識

生識，乃至不緣一切種智生識，是名不見一切種智相，故示如是，須菩提！是深般若波羅蜜能生諸佛，能示世間相。復次，須菩提！般若波羅蜜云何能生諸佛，能示世間相？須菩提！般若波羅蜜示世間空。云何示世間空？示五衆世間空，示十二入世間空，示十八界世間空，示十二因緣世間空，示我見根本六十二見世間空，示十善道世間空，示四禪、四無量心、四無色定世間空，示三十七品世間空，示六波羅蜜世間空，示內空世間空，示外空世間空，示內外空世間空，示無法空世間空，示有法空世間空，示無法有法空世間空，示有爲性世間空，示無爲性世間空，示佛十力世間空，示十八不共法世間空，乃至示一切種智世間空。如是，須菩提！般若波羅蜜能生諸佛，能示世間相。復次，須菩提！佛因般若波羅蜜示世

2598

間空，知世間空，覺世間空，思惟世間空，分別世間空。如是，須菩提！般若波羅蜜能生諸佛，能示世間相。復次，須菩提！般若波羅蜜示佛世間空。云何示佛世間空？示五衆世間空，乃至示一切種智世間空。如是，須菩提！般若波羅蜜能生諸佛，能示世間相。復次，須菩提！般若波羅蜜示佛世間不可思議。云何示世間不可思議？示五衆世間不可思議，乃至示一切種智世間不可思議。復次，須菩提！般若波羅蜜示佛世間離。云何示世間離？示五衆世間離，乃至示一切種智世間離。如是，須菩提！般若波羅蜜示佛世間離。復次，須菩提！般若波羅蜜示佛世間寂滅。云何示世間寂滅？示五衆世間寂滅，乃至示一切種智世間寂滅。復次，須菩提！般若波羅蜜示佛世間畢竟空。云何示世間畢竟空？示五衆世間畢竟空，乃至示一

2599

切種智世間畢竟空。復次，須菩提！般若波羅蜜示佛世間性空。云何示世間性空？示五衆世間性空，乃至示一切種智世間性空。復次，須菩提！般若波羅蜜示佛世間無法空。云何示世間無法空？示五衆世間無法空，乃至示一切種智世間無法空。復次，須菩提！般若波羅蜜示佛世間無法有法空。云何示世間無法有法空？示五衆世間無法有法空，乃至示一切種智世間無法有法空。復次，須菩提！般若波羅蜜示佛世間獨空。云何示世間獨空？示五衆世間獨空，乃至示一切種智世間獨空。如是，須菩提！般若波羅蜜能生諸佛，能示世間相。須菩提！是深般若波羅蜜示世間相，所謂不生今世、後世相。何以故？諸法無可用生今世、後世相故。」

論釋曰：般若波羅蜜是諸佛母，是因緣故，諸佛依止般若波羅蜜。

2600

住。餘經中說諸佛依止法，以法爲師。佛此中告須菩提：法者，即是般若波羅蜜。一切不善法中無過邪見，邪見故不識恩分。我自然應爾知恩者。諸世間善法中最上，能與今世好名聲，後與上妙果報，是故佛自說知恩報恩中第一。我尚知布施持戒等恩，何況般若波羅蜜？復次，諸天子！作是念：般若波羅蜜畢竟空，無定相故，或有人不貪不貴。是故佛說：我爲三界尊，尚供養般若波羅蜜，何況餘人！復有人生疑：佛於一切世間如虛空無所著，何以故貪是般若波羅蜜？尊重供養，似如貪著。是故佛說：我無貪心，但分別知諸法好醜，力用多少。知是般若波羅蜜能斷一切戲論，開三乘道，能滅衆苦等，有無量無邊功德，是故讚歎、尊重、供養。譬如人行安隱道，免諸患難，常念此道以示人。佛知作人者，知他作恩於己。餘處

2601

說佛不知作人，恐人疑，是故說佛知一切法無作相，知一切法無作相故，言無作人，不以不知恩分故名不知作人。言知作人，不知作人，無咎。

爾時，須菩提以畢竟空難世尊，若一切法畢竟空故，無知者、無作者，云何般若波羅蜜能生諸佛，能示諸佛世間？佛可其問，此中自說因緣：一切法空，虛誑無堅固。須菩提意：一切法鈍相，無見、無知，云何般若波羅蜜獨能知見佛意？一切法非但無知、無見，一切法空，不牢固，無知者、無見者，亦不可得，故不應難。復次，一切法無所依止，無繫故，無知者、無見者，種種門破諸法令空，或破常行無常入空，或破實入空，或畢竟盡故入空，或一切法遠離故入空。如是等入空，今以一切法無住處故，無依止，無繫，無依止故，亦無生滅，

2602

以是故，即是空不繫者，一切法實相不繫，出三界。所以者何？三界虛誑故，是以一切法無知者、無見者，如是示世間。般若不見色等諸法故，示世間。色等法無依止、無繫，虛誑故不見。此中佛自說不見因緣，所謂不生緣，色識乃至不生緣，一切種智識，是名不見色等法。問曰：識可不生，色云何不生？答曰：惱壞相是色，因識故分別，無識亦無惱壞相。復次，一切諸法從因緣和合故生，相無有自性。如有身識，觸諸緣和合故，知地堅相，堅相不離身識，是故諸法皆由和合生，無有自性。般若波羅蜜示世間空者，世間名五衆，乃至一切種智。菩薩行般若波羅蜜時，觀是法若大若小，若內若外，無不空者，是名般若波羅蜜示世間空。佛示世間空者，或有人疑：佛愛著法故，說般若波羅蜜示世間空，非是諸法常實相。是故佛

2603

說：我非愛法故說。佛知諸法相，本末籌量，思惟分別，無有法出於空者。我非但讀誦，從他聞故說，我以內心覺知，思惟分別，故說示世間空。此一段說示世間空者，上廣說離六十二見等，今但說五衆乃至一切種智。時會者謂般若波羅蜜是畢竟空，心想取著，是故說不可思議。不可思議者，畢竟空亦不可得。畢竟空或名離，或名寂滅。離名分散，諸法久後無遺餘，又自離其性。知畢竟空已，無心數法，無語言故，名寂滅。畢竟空等，如先說問曰：云何是獨空？答曰：十八空皆因緣相待，如內空因內法故名內空，若無內法，則無內空，十八空皆爾。是獨空無因無待，故名獨空。復次，獨空者，如虛空，如法性，實際涅槃，示世間非今世相，非後世相者，有諸外道但說今世，不說後世，是人邪見墮斷滅中，有人說今世後世，言今世

2604

神入後世，是人邪見墮常中。般若波羅蜜離一邊說中道：雖空而不著空故，為說罪福，雖說罪福，不生常邪見，亦於空無礙。此中佛自說因緣：此中畢竟空故，云何有今世後世見，若斷若常！

經須菩提白佛言：「世尊！是般若波羅蜜為大事故起，世尊！是般若波羅蜜為不可思議事故起，世尊！是般若波羅蜜為不可稱事故起，世尊！是般若波羅蜜為無量事故起，世尊！是般若波羅蜜為無等等事故起。」佛言：「如是如是，須菩提！般若波羅蜜為大事故起，為不可思議事故起，為不可稱事故起，為無量事故起，為無等等事故起。須菩提！云何是般若波羅蜜為大事故起？須菩提！諸佛大事者，所謂救一切衆生，不捨一切衆生。須菩提！云何是般若波羅蜜為不可思議事故起？須菩提！不可思議者，所謂諸佛法，如來

2605

法、自然人法、一切智人法。以是故須菩提諸佛般若波羅蜜爲不可思議事起。須菩提云何般若波羅蜜爲不可稱事起。須菩提一切衆生中無有能思惟稱佛法如來法、自然人法、一切智人法。以是故須菩提般若波羅蜜爲不可稱事起。須菩提云何般若波羅蜜爲無量事起。須菩提一切衆生中無有能量佛法如來法、自然人法、一切智人法。以是故須菩提般若波羅蜜爲不可量事起。須菩提云何般若波羅蜜爲無等等事起。須菩提一切衆生中無有能與佛等者。何況過以是故須菩提般若波羅蜜爲無等等事起。須菩提白佛言：「世尊但佛法如來法、自然人法、一切智人法不可思議、不可稱、無有量、無等等事起耶。」佛告須菩提：「如是如是佛法如來法、自然人法、一切智人法不可思議、不可稱、無有量、

2606

無等等。色亦不可思議、不可稱、無有量、無等等。受、想、行、識亦不可思議、不可稱、無有量、無等等。乃至一切種智、法性、法相、不可思議、不可稱、無有量、無等等。是中心心數法不可得。復次須菩提色不可思議、是亦不可得。乃至色無等等、是亦不可得。受、想、行、識乃至一切種智無等等、是亦不可得。須菩提白佛言：「世尊何因緣色不可思議、乃至無等等、是亦不可得。受、想、行、識乃至一切種智無等等、是亦不可得。」佛告須菩提：「色量不可得故、受、想、行、識量不可得故、乃至一切種智量不可得故。」須菩提白佛言：「世尊何因緣色量不可得、乃至一切種智量不可得。」佛告須菩提：「色不可思議故、乃至色無等等故、量不可得。乃至一切種智不可思議故、乃至一切種智無等等故、量不可得。須菩提於汝意云

2607

何不可思議乃至無等等寧可得色受想行識乃至一切種智可得不」須菩提言：「世尊不可得。」以是故須菩提一切法不可思議乃至無等等如是須菩提諸佛法不可思議不可稱無有量無等等須菩提是名諸佛法不可思議乃至無等等須菩提是諸佛法不可思議過思議相故不可稱過稱故無有量過量故無等等過等等故須菩提以是因緣故一切法亦不可思議相乃至無等等須菩提不可思議名是義不可思議不可稱名是義不可稱無有量名是義不可量無等等名是義無等等須菩提是諸佛法不可思議乃至無等等不可思議如虛空不可思議不可稱如虛空不可稱無有量如虛空無有量無等等如虛空無等等須菩提是亦名諸佛法不可思議乃至無等等佛法如是無量一切世

2608

問天人阿修羅無能思議等量者」

說是諸佛法不可思議不可稱無有量無等等品時五百比丘一切法不受故漏盡心解脫得阿羅漢二十比丘尼亦不受一切法故漏盡得阿羅漢六萬優婆塞三萬優婆夷諸法中遠塵離垢諸法中法眼生二十菩薩摩訶薩得無生法忍於是賢劫中當受記

論釋曰：須菩提深解般若相於諸法中無著無礙心生歡喜白佛言：世尊般若波羅蜜為大事故起等。大事者破一切眾生大苦惱能與佛無上大法故名為大事不可思議先已答不可稱者稱名智慧般若定實相甚深極重智慧輕薄是故不能稱又般若多智慧少故不能稱又般若利益處廣未成能與世間果報成已與道果報又究盡知故名稱般若波羅蜜無能稱知若常若無常若實

2609

若虛，若有若無，如是等不可稱義，應當知。無量事者，有人言稱即是量。有人言取相名為量，是般若波羅蜜不可取相故無量。又菩薩以四無量心行般若故，名無量。又量名智慧。凡夫智慧，二乘智慧，菩薩智慧，無能量般若得邊者，名無量。無等等者，無等名涅槃。一切有為法，無有與涅槃等者。涅槃有三分：聲聞涅槃，辟支佛涅槃，佛涅槃。般若能與大乘涅槃，故名無等等。復次，一切衆生無與佛等故，佛名無等。般若波羅蜜利益衆生，令與佛相似，故名無等等。復次，諸佛法第一微妙，無能與等，無能及者，無可為比。般若波羅蜜能令衆生得是心，故名無等等。復次，無等名諸法實相。諸觀諸行無能及者，無戲論，無能破壞，故名無等。菩薩得是無等，能於衆生中生慈悲心，故名無等等。是名無等等義。須菩提聲聞人無

一切智，而能說是不可思議般若等，佛可其所說。佛自說五事：衆生無量無邊，多於十方恆河沙等世界中微塵。諸佛以十力等法，盡欲救濟，是名大事。復有菩薩久得無生法忍，不捨衆生，故不入無餘涅槃。復次，是菩薩得佛道時，為衆生故受五事：一者、受諸勞苦；二者、捨寂定樂；三者、與惡人共事；四者、與人接對；五者、入大衆會。佛深得離欲樂，而為衆生故甘受是五事等種種疲苦，如受功德，是為大事，不可思議者，所謂佛法、如來法、自然人法。一切智人法。佛法者，佛名為覺於一切無明睡眠中最初覺，故名覺。如來者，如過去諸佛行六波羅蜜得諸法如相，來至佛道，今佛亦如是道來，如諸佛來，是名如來。自然人法者，聲聞人亦有覺，亦有如，而從他聞，是弟子法。是故說佛是自然人，不從他聞。一切智人法者，

辟支佛亦自然得，不從他聞，而無一切智，是故說佛一切智人法。是四種法無有人能思惟稱量，是故名不可思議，不可稱，不可量，更無有法與是法相似者，是故名無等等。須菩提，意恐新學菩薩著是四法，是故白佛言：但是四法不可思議，無有與等耶？佛答：色等諸法亦不可思議，無稱，無量，無等等。佛是中自說因緣，色等一切法不可得故。如是，須菩提！諸佛法不可思議者，是如上事，是名不可思議者。結句論者先廣解，佛此中略說不可思議，過思議相，過等等相。義趣涅槃法不可思議，名字世諦故可思議。如虛空不可思議者，如先品中說，虛空相不可思議，是故說不可思議，乃至無等等如虛空，虛空無可喻，故名無等等。般若波羅蜜相，即是佛法相，不可思議，無量，無稱，無等等，即是佛法相。是佛法一切世間

2612

天人阿修羅無能思議稱量者。六道中但說三道者，三善道衆生，尚不能稱量，何況三惡道！
問曰：說是品時，何以故比丘尼菩薩得道者少？答曰：此中多讚歎諸佛法，所謂不可思議，無稱，無量，無等等，聞者多增益信根，故是故白衣得道者多。「多」字應作少。女人雖復信多，智慧少，故得道者亦少。白衣貪著世事，智慧淺薄，鈍根不能盡漏。諸比丘信慧諸根等，一心求道，故漏盡者多。比丘尼智慧少，故二十人得漏盡，雖多得初道，數過白衣，不盡漏，故不異白衣，此中不說。入無生忍法，甚深難得，故少。又於此法種因緣者少。賢劫中當授記者，或有人言：賢劫中千佛，除四佛當與授記。或有人言：釋迦文佛與授記，於賢劫中，在餘世界作佛。

2613

大智度論卷第七十

音釋

煖乃尊切 登同 (今改作盆) 析先廉切
盆益也